

焦太史編輯國朝獻徵錄

焦太史編輯國朝獻徵錄卷之九十七目錄

山西

布政使

張賢

丘陵

謝佑

張文奎

林應標

李僑

李國士

叅政

彭通

曹本

李窩

祝顥

樊英

丘璠

郭桂

張敏

華津

王納諫

王獻

栗祁

叅議

黃常祖

王璠

李景繁

胡琮

韓邦靖

按察使

楊基

徐永達

副使

朱瑄

吳道寧

馬應祥

王九峰

程紳

胡賓

劉涇

南逢吉

趙祖元

僉事

劉珏

孫博

暢華

喬岱

孫璽

張時

知府

張賢

知州

何忠

呂昭

王汝績

張廉

李愚

陸偉

知縣

吳傑

學正

曹端

教諭

張敏

譙邑李文友

全校

吳興茅元儀

錢塘徐象標刊行

目錄終

猷敬錄

卷之九十七

三

焦太史編輯國朝獻徵錄卷之九十七

山西

布政使

山西布政司右布政使張公賢墓碑

公姓張氏諱賢字思齊予邠道安里人也居縣北衙道村家世業農父諱宣配王氏貳室劉氏生公公自少磊磊有氣節嘗讀書里塾既又棄去躬稼穡久之年漸三十矣一日爲里中人所困公豪邁人也氣霍霍不能堪乃拊几嘆曰嗟乎丈夫當自樹立羣小侮我齊民耳不學何爲乃復取舊書讀之尋入爲學官

弟子從師取友朝夕淬礪或時廢食寢踰數年而永樂乙酉舉鄉試矣其性敏而志篤如此屢赴會試次第調選授吏部司務薦陟驗封司郎中云公在部剛廉自持權貴不避閹節不通親友僎遺一無所取部中呼爲板張蓋言其節之堅也三載考績誥贈其父如已官母俱贈宜人云少子綱徒步入京師省問公見之怒曰農務方殷汝來何爲此中何所有而汝來也居旬日遣歸戒之曰勿復來也當是時國有戎事山西例輸餽踰期不至朝使在督者或以才屈罷或以賄敗當道忌公者欲害之乃以公往公至執其



奸惡者數輩痛懲之乃定期曰不輸者如此罰晉人  
前此亦聞公名見其威令如此咸股慄爭輸之無敢  
後者果及期完矣事竣返命天子嘉忱超拜山西  
右布政使比視事令出而人信不戒而民集感惠並  
流遠邇悅服以爲數十年來旬宣之政未有如此者  
長子紀徒步入太原道過曲沃曲沃令見其良苦以  
一驢送之既見公公怪其跨驢也詰之曰奚從得此  
紀不敢隱其實對公怒痛箠紀還令驢仍正其罪云  
公一日浩然歎曰老且至吾盍歸乎當是時吏部方  
以都御史擬公疏未及上公投牒而西矣旣歸休下

舊廬數楹僅庇風雨布袍蔬食無異寒素秦藩一叅  
議公部中舊僚也見其用乏以其所餘俸米輿送之  
公固謝曰田入自足用此君養廉之資不敢拜賜仍  
遣之與歸嗚呼此豈直予郭之罕覩哉居常教子孫  
曰資性可讀者教之讀其不能者盡歸之農慎勿  
爲吏壞身心辱門戶也閱數載老疾卒餘資僅具棺  
殮葬村之西北隅祖塋方臥病時語其二子曰身後  
毋納賻傷我節毋作誌表虛譽失我真毋聽人言作  
石獸器物侵我墓二子于是奉其遺命不敢違

山西左布政使丘公陵傳

朱睦㮮

丘陵字志高蘭陽人也宣德四年舉鄉試第一明年授咸陽教諭遷平鄉知縣凡所施設不憚勞苦邑有漳水暴悍衝決數爲民害地卑且無城郭陵築城又築長堤數十里以障水民得播種堤上復植雜樹以固基土木之變民恃以無恐故至今目其堤曰丘公堤云山西歲饑流民入境陵拊循之給以閒田使食其力民歸之者千餘戶先是廟學傾圯陵撤而新之又爲諸生嚴立課程時加考問其俊偉者則別館之日給薪米膏燭以勗其成邑之鄉社十二亦各立學

擇師以教之於是絃誦之聲達乎閭里在邑數年諸  
廢皆舉值家艱歸民攀留不得乃預計服闋之日詣  
闕請復任從之又數年景皇卽位以廷臣薦擢淮  
安知府天順四年陵入覲以政績卓異特賜錦衣寶  
鏤仍命張宴禮部以示褒勸累擢山西左布政使成  
化初李秉爲吏部尚書執法不阿學士彭華從子求  
京秩不得憾秉嗾同鄉給事中蕭彥莊誣劾陵坐逮  
乃上疏奏辯事白彥莊免官陵亦致仕後二十年平  
鄉百姓思之爲立碑出貲相事者如市淮民亦追念  
相率設主於名賢祠歲時致祭焉又採諸善政民誼

撰遺思集刻於郡中陵性清約未嘗有姬妾之奉好  
讀書老而不倦所著有嬰教聲律二十卷芸菴集三  
十卷藏于家子輅山西布政司左叅政

中奉大夫山西布政使司右布政使謝公佑神

道碑銘

公諱佑字廷佐姓謝氏世居安慶桐城之清淨鄉曾祖惠一號添錫祖住慶值元季世亂有乘時入鄉劫掠殺人者公從容諭止解其所縛而縱之賴全者衆世稱其有陰德逮入聖朝天下平定卽鄉之朱清波葺舊廬以居樂善好施鄉人號爲心善先生父永富母王邁疾刲股和粥愈之人謂之孝子妣錢氏有懿德生二子長俛次卽公也公天姿雋爽幼有巨志父早卒家貧錢躬紡織以拊之嘗牧牛田野間每袖

書於牛背上讀人咸異之甫成童縣尹欲舉民秀增  
廣學校生員時贈知州章公某封員外郎黃公子清  
俱爲庠生共舉公族長之子以充族長度子弗堪集  
族子弟問孰願爲皆默然公獨應曰吾願往母惜之  
爲泣下公慰母曰見得爲秀才不愈於牧牛乎遂補  
庠生寓員外公所拜爲師員外公教之習字肄業公  
遽知用功日進一日竊朱書欲求生富貴須下死工  
夫十字於几員外公忽見陽斥而陰重之教諭冷公  
脗初至選公聰敏者數輩注意訓迪日授書數千言  
公讀不過二三十遍輒能背誦冷公深期待之諸生

遇假日多事佚遊公獨理課業於史志諸書無不博覽工詩賦及駢儷之文不泛交際遇益友必執贄以求講訂知州公愛如已子供其所費不靳習詩經患無師傳賴南昌朱孔修先生引拜吉水尹司正先生得經義百餘篇以爲式自是砥礪成文越三載經書豁然通貫宣德乙卯遂領京闈鄉薦正統丙辰登進士第親政刑部邑自國朝開科以來無登進士者登進士自公始舉邑咸歎慕之丁巳授本部陝西司主事獄獄公恕己未秋以疾辭歸辛酉疾愈赴京壬戌春調戶部四川司主事蒞政有能聲命解官銀萬鎰



赴遼東糴糧以實邊庾陞署本部廣西司員外郎景泰改元賜勅獎美贈考如公官妣封太安人妻封安人迎太安人就養官舍己巳秋北虜入寇以公有風力改監察御史奉勅出鎮大名練兵保境以爲京師聲援公至修城垣造器械拊流移訓士卒號令嚴明百度振舉軍民帖然事定還朝陞署本司郎中復奉勅往督山西邊儲接濟大同宣府事還與實授未幾陞廣東布政使司右叅政天順改元復賜勅褒美加封贈其父母如制尋陞河南左叅政戊寅陞山西右布政使公蒞官慎勤存心仁厚凡所設施務使民沾

實惠前後志操始終一致兩主提調科場上類悅其  
公道成化丙戌年方五十有六苦風疾具疏懇乞致  
仕歸家杜門養和不干世務奉觴壽母樂其天倫爲  
人器宇軒豁脫略羈馭絕無町畦發言談笑一座盡  
傾好評論人物窮其底裏人多服其至當作文雅淡  
詩有唐人風致書簡得歐蘇體有宦遊學藏于家晚  
於祖基作室爲佚老所鑿池養魚開園時蔬周垣植  
以嘉樹客至則開宴堂中觴詠爲歡或散步園池以  
爲適已丑太恭人以壽終公哀毀喪葬一依文公家  
禮不用釋老二教鄉人化之庚寅春至邑中訪故舊

首謁文廟次造員外知州二公家分惠俸金以酬舊  
德越數日還鄉而風疾復作矣享年六十

中奉大夫山西左布政使蒲山張公文奎墓志

銘

許宗魯

嘉靖己酉十一月六日山西左布政使蒲山張公卒  
于家公源出山西五臺縣後遷介休縣再遷河南靈  
寶縣元末諱善者始遷陝西洛川縣善生巖巖生福  
福生封文林郎兵馬副指揮貴生山西保德州知  
州郁郁配贈太宜人紐氏生義官文翼繼配封太宜  
人任氏生公公行居諱文奎字應光蒲山其別號  
也生有至性聰敏過人而篤信力行不事華飾始受  
學于鄉之孫先生年十二能文章遂菴楊公督學試

補縣學生員歷試學臺皆列首選正德丙子以詩經  
舉于鄉明年丁丑舉進士試政吏部已卯授刑部廣  
東司主事無何丁外艱嘉靖甲申服闋復除江西司  
丙戌晉貴州司署員外郎其在部署躬勤聽斷據法  
原情不撓權勢不侮寡弱稱明允焉某年陞四川按  
察司僉事先時芒部弗賓叛服無常公理其事親涉  
夷境論以革流復土事由夷民歸化時蜀地屢饑振  
施惟殷乃遍履荒遐若漁若貴至皆再三不以難苦  
避遜適有貴宦謫居行頗不法公繩約以憲略不假  
借致有流言以蔽其賢已丑考察量移山西按察司

督理屯田是年始受主事考績之封保德公秩崇從  
本階緌任從夫階誥贈封俱宜人公與厥配王受勅  
命王封安人云時叅將某違例占種人不敢誥公按  
劾不貸屯政就理尋以賢能膺薦再奉璽書飭兵石  
隰武備聿脩癸巳考績晉四川布政司右叅議是時  
向所繩者適撫其地公援例疏請迴避因有論辯詔  
命所司停勘公乃覓歸田里卽浩然自休構亭教授  
曰吾當爲蒲鄒山人矣丙申事白奏上左遷一級丁  
酉添註直隸廬州府同知往添註官多不事事公力  
政不息墾荒復通郡乃大治戊戌晉湖廣按察司僉

事督理江防已亥 上南巡興部公職除道建航供  
備行宮所事克舉 上嘉其勛賜衣二襲白金三錠  
是歲 章聖皇太后祔葬顯陵公護梓宮自劉家隔  
抵石城驛川途無警奠獻如制乃又以法檢束從官  
往來道途事集而民不擾使者以聞復賚衣一襲白  
金二錠庚子晉江西按察司副使職清軍伍兼理驛  
傳公按籍稽勾酌宜裁革二政允修若其發指揮羅  
某之奸息妖人易盛之亂尤爲顯勛壬寅晉四川布  
政司叅政癸卯入蜀視事乃革州縣庫役之供應罷  
西路夫役之輸銀催科撫字寓仁于政民愛畏焉某

年晉江西按察司按察使江西爲南方之大省宿號  
難理先政在民民見公至欣迎載道公持守不阿貞  
肅有道憲度改觀未幾晉山西布政司左布政使歷  
官既久廉節愈厲惟攜二童侍行俸金亦以貯庫大  
率加耗裁損公費覆露廣遍晉省以寧然以下通請  
謁不事逢迎久居不遷丁未以內艱西歸居憂讀禮  
無愆孝思至是卒卒之先數日夢乘白馬而行又夢  
雪中輓紼覺語其子曰日且大吾其死夫已而果  
雪沐浴正冠奄然逝矣公性沈毅而慈仁任事不退  
待物不刻故論者謂其有仁者之勇然志存經濟用



不釣樞談治道者惜之晚年好神仙服食修煉自謂  
有得恒以仙官自況公退燕居凝神內照泊如也往  
歲予臥病公自蜀中寄致黃庭經一帙副以手書云  
吾誦此經大有神驗子能持誦萬過諸病可獨因致  
長生之道予心信而感之謂公能是道也而竟止此  
其故何邪然乘馬雨雪之祥自刻反歸之期殆亦有  
所得已

山西左布政使林公應標傳

徐觀瀾

林應標字君儀系出端州登嘉靖癸未進士授禮部主客司主事會夷人進玉郎中陳九川驗入旋失之事覺赴詔獄郎中惶急不知所裁設抵云是日爲林主事直署期司隸詰之再應標佯不省坐誣服受杖並繫人問之曰幸得爲同舍郎情親遇小利害輒抗辯是市交也且柰夷人姍笑何久之進王者復至司隸召至府出二人令譯者通其意夷熟視應標數搖首見九川撫掌頷之誣始得直然應標終不欲令郎中獨坐而已得幸解也於是同朝人士凡稱應標長

者而不直九川也後出爲江西僉事累陞至廣東按察使訊獄有取夷舟覆漂物者爲怨家所中寘重刑先後廉訪使視爲已成事不復再鞫應標廉其狀輒云此非剽客流坐怨家誣服而文致者不深核之也竟出之轉江西右轄遷左轄時袁州相嵩已專政矣江西歲出籍錢數十萬市上方物輸之少府故事率聽京州子壻具駟僮之徒司之以故籍錢空帑而京師主進者不見持一錢入應標至嚴壻袁應樞復以爲請袁以林謹願此特畫諾聽之不意其拒之深也銜之又藏中無名錢先是諸左使輒括之爲問遺袁

州具應標誠慎封識筦庫掾數以爲言云此左使陟  
開府道地也應標笑謝之坐是調山西時晉府以子  
錢鏐食諸王子祿諸王子至不能厭糠覈應標至召  
教授庭讓之曰若不聞馮驩操劓綏抵孟嘗君所一  
窮客也尚能令薛民親孟嘗而游揚其名今朱耶無  
食客之費而宗室非薛民之比若專輔導乃不能如  
一門客力乎詞色俱厲教授蒲伏謝無所容自是散  
祿必召諸王子至庭以次授之晉府積空券無所舒  
憤乃撫他事誣訟闕下袁州相受晉邸金猶以前銜  
未已遂可其奏應標嘆曰吾獨不念主客時尚能激

昂置不辯事乎遂趣裝歸年五十六卒于家

原  
书  
缺  
页

二疏尤爲人所稱說初使山西清理軍伍稽察按牘  
寃心所事卽行陣充足淹弊釐革其再按山西也時  
值薦饑且罹虜患下車卽請帑施賑民籍以生乃其  
周邊方之處置而武備修急學校之敘養而士風振  
別部吏之臧否而官常飭嚴府庾會計而錢穀裕諸  
所設施憲度斬斬其決晉藩襲封之疑以杜爭端陞  
潞安州治爲府以弭宿患尤人所推論者總其先後  
論皆經國遠猷裕民至計若崇聖學設總制繩黃內  
侍之違法劾席尚書之庇私糾常都御史之怠事參  
郭武定之侈僭種種多故海內想望其風采詳載家

傳志不悉云按王氏之先山於渭南蒼頭鎮諱舜卿  
者選守文武陵寢徙居畢郢原下遂爲咸陽人有諱  
瑤者國初爲宮寮然皆譜牒無考不可論其世次  
至諱十者生子士榮士榮生整整生才初授散官封  
文林郎江西道監察御史加贈中憲大夫山東按察  
司副使配岳氏封孺人加贈恭人其子卽南澧也諱  
獻字惟臣以居澧渭之汭自號南澧



山西布政使司右叅政栗公祁墓志銘

于慎行

東巖栗公者諱祁字子登世爲山東夏津人大父以上隱德不顯父節爲邑諸生以公貴贈戶部郎中母前封太宜人太宜人之賦栢舟年甫二十有二公蓋生三歲而孤也稍長就外傳文日有聲燁然爲名士嘉靖辛酉舉於鄉明年壬戌第進士授徽州府推官徽俗故黠好氣間里小不相下輒聚徒格鬪或有所殺傷人投諸水火則詣吏訟常十餘年不決吏甚苦之公察其情謂此難以法彈治顧常爲好語三覆勸

譬之民反輸寫心腹有所感動老吏嚙指悚服乙丑  
擢南京戶部主事推稅杭州杭州物力華侈號爲金  
穴公益以清操自矢月俸之外魚鹽蔬米無私毫毛  
越中士大夫皆慕而歌誦之已擢本部郎中滿考詣  
闕隆慶辛未以望拜湖州府知府下車卽移記與吏  
民約太守爲天子牧養百姓輕徭平賦相與休息不  
多爲條教以清其耳目令長以下皆體此意守湖三  
年政和役簡民無擾焉決獄惟務平反不喜以微巧  
文中人曰吾爲民父母柰何撓三尺法以罔赤子然  
至家解文吏銖兩之姦又無不立發矣郡海水災民

大饑亟謁部使上書蠲其十之二三又漕卒故代他  
衛輸十餘艘請還其籍軍困以紓往郡多錢穀若賈  
人權會歲致羨金若干爲筦庫費公悉謝罷之湖人  
頌公至不容口尚書潘公每爲人言吾自兒時至今  
所見賢大守無如栗公矣乙亥擢山西按察副使備  
兵懷隆去郡父老夾車轂泣送不下千人懷隆者在  
上谷漁陽間號當路塞東南護陵寢自虜款關少烽  
燧然治兵者常重其選非才識練習不使往故以屬  
公至則大修築邊公行視故亭障徒取文具雨至輒  
壞乃躬立脊鍾閒勞苦吏士所築殊險固稱雄又以

其暇秣馬訓兵修屯庀具士毋敢解甲以嬉軍中有  
訟不甚裁以文法惟笞而遣之曰塞卒困極矣日負  
土石操戈寢所入不盈庾斗慊慊苦饑一傳爰書卽  
三月原立盡使當虜奈何以故所居塞整辦過於他  
道吏士戴之居三年貢市告成有詔賜白金文幣卽  
拜山西叅政兩臺交章薦公大臣閱邊還報稱公可  
大用而廷中議遂以公開府北邊矣一旦構小疾卽  
不起惜哉公爲人豐頤重厚舉止雍容美文詞平恕  
不苟馭下取寬簡而持己獨嚴所至有廉名自筮仕  
往來蹤跡多在江左每歸北惟圖書數卷嘗自稱曰

今爲吏試右職率務積橐裝爲子孫計多藏厚亡反  
受其殃或喜蓄玩好不惜千金購之至以賈怨不肖  
子持之曾不博一飽徒爲人指笑何益嗟乎有味哉  
是言足知公平生矣公生嘉靖丁酉卒萬曆戊寅得  
年四十二歲

山西左叅議黃公常祖志銘

彭韶

正統末韶入郡學獲見前輩風致及其時禮俗大槩  
老成朴素遠浮薄恥言人過居室服用多因仍舊故  
婚姻交際略備儀文而已安識驕侈而以相訕相憊  
哉郡志所謂俗幾鄒魯實於緝紳故老有賴焉時若  
會元陳公舜用郡守方公庭訓鄧公季述及澹軒黃  
公四五人皆朝野鉅望黃公於居室終身不栉一椽  
尤爲舊俗繫重柰不數年前輩淪謝素風漸微似聞  
後生耳濡目染去儉入奢君子每爲之慨嘆若公遺  
行安可不傳示於後人哉公諱常祖字邦經先世居

浦江簪纓濟美爲閩大族曾祖林元涵江書院山長  
祖佛不仕始遷城西梅峰峰下父震號梅東又遷義  
井以公貴贈奉直大夫工部員外郎妣蕭氏封宜人  
梅東公精易學爲莆士師公少習之始遊郡庠又從  
林三復顧在軒二先生治尚書學復卒業殿元林綱  
齋之門修詞知名遠出流輩雅爲莆守周公琰所器  
許已而公應貢升太學生舉永樂辛卯京闈鄉薦明  
年壬辰榜三甲第一人授行在刑部廣東司主事曾  
事繁劇因得練習滿三載陞員外郎彌加詳慎嘗有  
進人書者五日不得報懼而自刎詔旨疑有他寃鞠

其居停婦將抵死公原實平反以免丁內憂服闋工部尚書吳公中董營建奏爲其屬採木于山西湖廣時督促嚴急公爲上爲下悉心殫智事集有緒民頗得息肩有御史周姓者共事不法公糾罷之事竣秩且滿受誥命封贈父母援例省祭榮歸于家人思周守爲知人旣選用少師楊文敏公薦陞山西布政使司左叅議并晉地瘠民貧值歲凶多流亡公奏乞招徠聽免徭役三年悉復業平陽界上有盜聚千人爲害公推誠諭之不旬日皆降附正統十年滿六載致仕歸年方六十三公形神清朗動止穩重性孝友母



肅宜人嘗病革祈以身代而愈後數年母沒築墳于鳳凰山掘地三尺許得甕器五銀牌一上刻使司字有署押蓋昔人所定壽穴未及用而公得之教諭林魯瞻爲福地記時公未佐藩後果符署刻人以爲孝感所致堂兄順美等沒無嗣公爲之殯葬嫁其孤女旣老羣處里社未嘗以齒爵自異是後行人方公源深等繼歸故里刑部員外郎劉公玘時尹蒲邑請合會元諸老入會號曰耆英興守張公淵立坊以表之郡故事未有也 憲廟登極公進階中憲人夫優游城居二十餘載至成化丙戌三月卒年八十有六

山西布政司左叅議王公璠墓表

邵寶

公姓王氏諱璠廷瑞其字也陝西鞏昌府寧遠縣人  
國初有以人才官某縣者後遂居之高祖謙曾祖仲  
榮祖興咸隱弗仕公之父永昇舉景泰癸酉鄉貢授  
河間府知事以公貴累贈奉議大夫戶部郎中母賈  
氏贈太宜人河間四子公其季也公穎敏不凡河間  
奇之遣與其俊彥者游公弱冠河間當考最嘆曰吾  
親四子惟璠也偉其將以材顯乎髮吾種種尚可僕  
僕人下乎遂辭職去歸其鄉命公入邑庠戴恭簡公  
以按察副使督學見而器之會同舍生侵學傍隙地

衆悉於官以齒推公爲先公素伉直領之事聞不行  
衆更詭爲文投之縣代署公名非公意也尋覺發於  
巡按視原文有公名例出爲掾戴公聞之曰吾識王  
生豈爲是者哉然莫能救也是歲癸卯當鄉試戴公  
乃牒縣以掾入試遂得舉自逮事至是凡八閱月耳  
明年甲辰登進士第河間疾且革聞報喜曰吾願畢  
矣尋卒公聞訃奔歸伏地大慟以祿甫及而親不待  
有終天之恨焉築廬墓傍手植松楸置祀田百畝服  
闋奉繼母徐氏之京授戶部主事監督臨清水次倉  
同事中貴剝剋萬狀酷流諸郡公力與之諍某月間

縛奸胥輩二十餘人皆寘於法時有真部使之稱進  
員外郎丁內艱服闋進郎中奉勅總理遼東糧儲兼  
管屯種於是邊費每告乏公杜請託謹權量尺布斗  
粟必親稽焉閱實至得羨若米千萬數考以稱最好  
商射利不遂者朋誣于廷公疏上其狀下御史臺治  
而法之凡百十餘人故事征商額外有楮價充公用  
公悉罷之既還朝補貴州司奉勅饋運漕河時值某  
藩之國河道壅滯公夙夜乘小舟巡視衣不解帶者  
四十餘日上便宜數事詔皆行之人以爲便尋擢山  
西布政司左叅議分守冀北道冀北古雲中地匈奴

出沒不時戊卒饒餉恒虞不繼公多方調畫邊鎮荷  
爲重壬戌朝正考覈羣吏鈞陽馬公在銓部方以公  
爲材而濠梁顧公以都御史叅會竟以臺評罷公爭  
之不能得屢稱于人先是山東叅議某者以分守在  
遼東與公不相能其兄司徒公每平之公之被黜人  
謂某有力焉公初被黜上疏自序其課績所得詞語  
大意謂外銓籍而信流言蒙名士以重謗請下臺司  
根究屬藩府暨鎮撫臣亦有上疏留公者詔命之辨  
公再疏撫臺評之失云云且謂臣猶出婦借得復歸  
亦無顏與婦姒相見請雪其冤而許之退事下臬司

公三疏請稽報不時上之故語益峻切會孝廟崩事遂寢逆瑾竊柄時有勸公赴慰者公笑謝焉曰吾以吾行之不白故忿而有言今就傍途吾之心事誰與白者言者愧而去公在京師久之南游至江淮愛揚爲文獻地又以女歸兵部儲郎中洵可依以家也遂卜今居未幾以疾卒年五十三論者課公天性亢爽痛厭世之齷齪忍垢者事多直遂名以是得而謗亦隨之然風負幹局尤習吏事使究其用當必有所樹立而僅止乎是知者惜之烏乎孔子曰人之過也各於其黨觀過斯知仁矣吾於公有感焉公自爲諸生

仇直自許羣議攻人輕於一諾遂蒙不寢至落士籍  
及居官奉使知有國法不恤毀譽當商利交征之時  
獨搜刮弊端以賈羣怨察入淵魚亦或有焉而心則  
共且勤矣論者媒孽而指撻之公抗章自辨至于再  
三詞氣俱壯逮權奸當路一言投隙立可甘心於人  
乃退然止縮雖或勸之不爲動也公於是時寧忍一  
時之憤而不欲傷朝廷之大體寧受終身之玷而  
不欲壞士夫之大節此其心爲何如而凡前日所謂  
過者可一言以釋之矣然則所謂觀過知仁者吾不  
於公有感乎

山西右叅議李景繁傳

朱睦㮮

李景繁字邦泰儀封人也幼而好學器度不羣治朱氏詩成化五年舉進士授陝西三原知縣三原多大商鬻販淮揚間貲累數萬每昏喪費千金景繁禁之使如制逋民歸者復其田廬死者給以棺居數年稍遷太僕寺丞改工部營繕主事二十三年遷虞衡員外郎尋轉都水郎中管漕河時漕寒白儀真入淮凡三百里舟膠不行有詔命都御史暨郎中治景繁獨任之募夫八萬人初漕邵伯湖楊子橋三汊河廣皆六尺次漕廣陵驛東廣倍於三汊次漕朴樹灣廣三



倍於初次濟儀真瓜洲二壩廣倍於朴樹者三深於  
舊者各五景繁行瓜洲堤上見東南多沮洳區間土  
人此何所也曰江湖之匯也景繁導之自古劄港劉  
家灣入清渠曰今清渠非得巨流濟之舟終不可行  
如值江湖時開壩開恣江北走已卽塞之天復大雨  
漕事成矣土人曰河亢而江下非壩障之則河水悉  
倒流入江清渠益淺都御史而下咸謂李策非善景  
繁曰江水故平潮至則悍激耳潮退水亦易制也遂  
下令有司具土暨石潮至大決壩開江水奔漕水聲  
洶洶如雷景繁乃塞壩閱數日會大雨漕渠水瀾瀾

襄岸舟乃大行河經徐州盩州將囑居人震恐景繁  
又作石堤河不能爲害弘治六年遷山西右叅議理  
儲景繁行塞上十年而餉運不闕擢四川右叅政以  
疾乞致仕歸論曰余聞國初導諸泉合洸汶泗沂之  
水以益漕漕不告涸後百餘年而泉源涸匿者過半  
故漕惟資於河河水濁而易淤是以屢通屢塞廷儀  
之治泉雖重忤人弗計也邦泰導古割港劉家灣潮  
至決壩開俾江水奔漕漕於是大利非見明勢力不  
搖於羣議其功豈易成邪故曰民可使由之不可使  
知之李公之謂也

胡叅議琮傳

文徵明

叅議胡公琮字文德蘇之長洲人也成化初舉進士  
爲江陵知縣縣隸荊州荆旣重鎮而江陵輔邑地大  
物繁民慄悍易動更數令政不治公疏舉博謀隨事  
經理稍用法剪其豪猾不令得肆逾王以近屬橫甚  
其下兵校椎埋圍奪尤多無賴公一繩以法無所貸  
王不能堪日夜思構公時時饋食藥以金錢庶幾公  
一顧得以劫持公旣端介不可涸則相戒斂戢終公  
去噤不敢爲暴湖襄盜發朝廷籍土兵討之夷獠諄  
諷素無紀律推刃劫奪所過警擾公大具牛酒先享

飭其渠率俾爲要束而身自餉終皆厭屬逾望以次  
受檄去無有譁者居三年徵入爲監察御史以事左  
遷知黃之麻城亦湖南劇邑民習問公江陵之政惴  
恐守法公顧其民淳質可以導化乃不事搏擊一意  
相循俗佞鬼鮮知禮義乃毀淫祠表章節孝時時進  
其父老儒生問民所惡欲而罷行之民用悅服俗以  
丕厚梢遷常德府同知廉方自持頗不與羣僚狎比  
或言於守曰同知故京朝官豈能爲守下守嘆之公  
不爲意俄而守爲上官所持公審畫導利卒用計脫  
守守嘆曰胡同知仁人也而幾失之自是非胡同知

莫與計事大璫自滇還道出湖湘所至笞擊官吏責索賂遺公故不爲禮徐召邏卒隨以出若將檢其案裝者璫懼急引去他日有詔括金諸郡檄牒旁午公持不卽下僚屬相繼進說恐閣詔得罪公曰常德郡貧歲且儉矧金非所產又何賦外有徵乎卽罪罪主者不以累諸君也已而詔罷不徵而他郡先有徵發者聞常德事甚愧在常德數年以母憂去再起同知處州處故有礦穴官守之民或他處發地得礦中官卽欲奏籍於官公不可曰愚民偶有所獲旣非故穴其出不常萬一籍官則有常課一不登則將取足於

民民且獲重困我在豈可使吾民重困乎卽上疏言  
先王之政取於民有制蓋不欲盡民之利也況與民  
爭利乎其言明切懇至 朝廷卒從之在處期年屬  
時缺守而倦遊矣命滿考赴吏部遂乞致仕時王端  
懿公主銓彭惠安公爲吏部侍郎素皆知公皆欲慰  
薦公而公去意堅決遂爲論奏增秩以朝列大夫山  
西叅議致仕先是公在處州彭惠安以都御史巡視  
兩浙處爲屬郡常以邑子爲丞者屬公公按黜之惠  
安不以爲忤反益賢公及是去尤甚惜之戴縉者公  
同年進士又嘗同爲御史雅相厚善其後戴爲權璫

引用攀附驟貴公遂去之而戴念之不衰及公浮湛  
外僚數致意欲援用公公絕不與通他日以事至京  
戴方爲刑部尚書顯赫用事蹟公所寓躬候之亦避  
不見蓋公修正疆執不欲附麗匪人故仕中外餘二  
十年潦倒僅以一郡倅終老林下一時論者或有遺  
望而公自視乃無不足生平寡與旣歸益事韜匿門  
庭寂然郡邑大夫往往不知有公弘治間有爲郡守  
者雅知延禮郡彥於是諸郡彥共請公爲會偶其人  
被酒許語公卽起馳去恚曰吾本不見時人無事輕  
出乃爲鼠輩所侮自是掃軌滅跡雖故人親戚亦罕

親接年七十九終於家 論曰傳不疑有言太剛則折而蘇氏非之以爲此鄙夫患失之言也夫剛亦貴有以養之孔子曰張也欲焉得剛惟無欲乃能有養耳以余觀於胡公歷仕郡縣靖共正直必行其志卒用受知當路使其時不卽引去必亦馴致大官可以有爲而剛方嫉惡必不能脂韋取容萬一爲小人所構將舉平生而失之於是乎剛則折矣夫以蕭太傅顏平原之賢又皆爲君上所知而卒皆不免議者猶以其老不知去有以致之然則胡豈獨能剛哉其所  
以養之者深矣



山西布政使司左叅議韓公邦靖墓志銘

王九思

五泉子者諱邦靖字汝慶同州朝邑縣人也姓韓氏  
蓋自稱曰五泉子父曰蓮峰先生諱詔宗仕爲按察  
副使母恭人閻氏蓋弘治戊申正月初一日子時生  
五泉子是夜恭人夢五色雲中奏咸韶之音已而玉  
女十餘持蓋擁一童子入室覺而生五泉子五泉子  
生而靈異三歲而能誦古詩百餘首四歲而能通孝  
經五歲而讀論語文王至德篇掩卷若有思者蓮峰  
先生問之對曰卽如是武王非矣八歲而通舉子業

十四而舉于鄉二十一而舉正德戊辰進士予與武功康德涵愛其才推爲庶吉士不果明年己巳拜工部虞衡司主事乃奉部檄十庫監收庫宦官不爲禮五泉子自坐前席宦官怒給曰部尚書至因起撤坐五泉子詰之答曰公無與庫事者止一飯耳五泉子曰然則吾當去矣答曰當署案五泉子曰豈有署案不與庫事者乎竟前席坐署案尋又兼收黑窑廠主廠者宦官厚燕接殷勤之歡五泉子不顧自起視秤分毫無所假宦官雖怒甚然無可柰何未幾抽分浙江市舶去矣先是抽分部使者往往避嫌乃重取於

商爲羨餘以自白五泉子乃下令曰非巨本若竹木  
成器者不稅稅課舊領府幕官乃奏議寄布政司不  
與府幕官以部使者侵漁而府幕者易與耳又奏抽  
分司刑獄宜下按察司以防出入詔皆可故事抽分  
司隗鎮守太監歲千金是時鎮守劉太監者又谷大  
用之黨五泉子固不與金劉太監怒久知其爲人不  
怒愈益敬之會宦者從京師來倚其近幸索抽分錢  
甚急劉太監從旁勸曰幸無求韓主事我嘗有以贈  
公也及代入奏乃課額不足部尚書及工科給事中  
皆以法劾五泉子亦自劾求罷會國老有知其故者

以無事壬申春南北畿內山東河南諸郡盜起  
天子命將征勦工部官例一人前除當前除者數人  
皆懼不敢往言之部尚書有泣下者次不及五泉子  
部尚書知五泉素勇可使數日五泉子五泉子毅然  
請行後亦有天幸不害北歸遷員外郎都水司出奉  
部檄清查直隸山陝諸路歷年班匠銀兩旣見其民  
貧乃奏議罷徵是時急於用財不許後以乾清宮災  
竟罷之而天子於是方以災異下訪求直言者五  
泉子歸上疏曰夫民者樂安而思治惡危而厭亂向  
背之際甚可畏也 陛下卽位以來朝政不修經筵

臣御盤遊無節狎近羣儉摧折骨鯁之臣閉塞諫諍之路百度乖違庶事叢挫府庫空竭閭閻流散盜賊災異荐至迭興危亡之形已成社稷之憂將大頃者乾清宮災 陛下下詔求言天下之人莫不祈望以爲 陛下翻然改悟轉危爲安也然徒事虛文不修實政臣下章奏罔有施行而部官黃體行乃又以言罷去天下人心莫不沮喪以爲 陛下遭此大異乃復如此是悔悟無期而治安不可望支離不可收也夫親離者家散民離者國搖故漢儒有土崩之言先哲有搏沙之喻伏望 陛下以社稷爲念將各官章

奏採擇施行前後言官待罪之人并黃體行取回等  
用于以收旣散之人心迂將來之福澤天下國家不  
勝幸甚疏上 天子震怒下錦衣衛獄給事中李君  
鐸率衆論救之乃奪官爲民其後御史師君存智范  
君輅給事中徐君之鸞皆奏起用不果辛巳秋 今  
上卽位起爲山西左叅議分守大同於是感激奮勵  
單車就道革奸平獄權家斂跡然分守道故無印由  
此多弊乃奏議請照提學官事例給關防不報是時  
天子修定策功封爵太濫而高山陽和諸衛軍士  
奉例開墾草場數千餘頃皆爲豪家占種乃前後上

疏論列又皆不報未幾大同歲饑人相食又奏議請  
發內帑賑濟不許爲之慙然泣下輟食將再論之或  
曰君之心盡矣不從者責有所歸也獨柰何自苦如  
此答曰言而不從自謂已責已盡而委咎於人此詐  
臣之自便而釣名者之爲也復抗疏論列累千餘言  
不報侍郎臧公乃奉經略邊務嘗奏疏薦之而曰臣  
見左叅議邢靖穎秀夙成操心平正問學博洽議論  
淵源使之提學必能率士裨輔治道巡撫都御史楊  
公志學給事中俞君集亦奏薦之皆不報五泉子慮  
舊疾復作乃上疏乞歸于是都御史張公文錦奏留

之而謂宜陞本道兵備副使以慰軍民之望然歸志已決乃復上疏報未下卽行御史朱君寔昌奏疏薦之而以邦奇邦靖學問自相師友名節交相砥礪乞將邦靖病痊起用邦奇者苑洛子也吏部具奏上報曰如御史議西歸之日軍民遮留道上以萬計號泣不忍舍去五泉子亦爲泣下而嘉靖癸未二月初十日抵家於是謁孔子廟揖縣令拜先隴牲見於祠堂稱傷壽母與諸兄弟燕會終日甚樂也乃十八日病損食不豫苑洛子爲迎醫甚衆乃愈益病四月初十日衣冠如平生呼苑洛子曰我其逝矣十九日必大



雷雨卽爲我戒衣衾又曰先君之歸在是月二十一日我強待之好作忌辰也十九日果大雷雨苑洛子爲正冠然已不能語而搖首苑洛子泣曰待二十一日乎乃首之及二十日而苑洛子復問曰歸在明日乎不應苑洛子痛泣曰吾弟力不支矣又首之已而果卒距其生蓋三十六歲云配安人屈氏生一女無子以族子仲譜後自五泉子卒後太恭人泣之不已苑洛子廢寢食泣蓋其平日孝父母者甚至終身不違顏色逆峰先生病寢處其側者四月餘及卒哀毀幾死其事伯兄縣令君邦彥及苑洛子及處其弟國

子薦邦胡極兄弟骨肉之愛有朋友忠告之益又嘗  
爲其姊李孺人吮疽鄉人蓋嘗立碑表其孝友云而  
其愛民之仁律已之廉食用之儉細行之必矜臨事  
應接之敏其事皆可書者不具書其在浙得代歸而  
同年趙推官者以屈安人病無子買女婢遺之拒不  
受趙曰此越女有色者笑曰政恐若此耳此人所難  
能者書之爲世楷法銘曰予在京師見五泉子七言  
絕句詩類杜子美及罷歸爲予誦其古歌辭浸淫唐  
初通漢魏矣觀朝邑志其亦文章之洪麗乎夷考其  
行蓋曠世之英全德之士也乃不壽死

嗚呼天耶孰  
爲五泉子耶

按察使楊公基傳

楊基字孟載其先蜀人大父宦游江左而基生吳中  
遂家焉穎敏絕人九歲能背誦六經著書十萬餘言  
名曰論鑒試儀曹不利會天下亂歸隱於之赤山  
張士誠時辟爲丞相府記室未幾辭去又客饒介所  
王師下江南籍錄諸陪臣基以僥氏客安置臨濠旋  
徙河南洪武二年放歸尋起爲滎陽知縣謫居鍾離  
久之被薦爲江西行省幕官以省臣得罪落職六年  
又起奉使湖廣召還授兵部員外郎出爲山西按察  
副使進按察使後被讒奪職供役卒于京基尤工於

詩初會精揚維禎客松江往來吳中以詩自豪基嘗  
於坐上賦鐵笛歌維禎驚喜與俱東語所從曰吾在  
吳又得一鐵來矣若曹就之學優於老鐵學也至正  
洪武之際與高啓張羽徐賁齊名號吳中四傑所著  
有眉菴集

山西按察使徐公永達墓表

楊溥

公徐姓諱永達字志道世傳唐侍御史有功後曾祖仲明祖景讓考子昭世有善譽母苑氏儒家女公幼學敏悟好讀書入鄉校習舉子業洪武丙子秋中河南鄉試魁年甚少人多奇之明年春陞太學戊寅授陝西同官縣學教諭後調湖廣之宜章以外服闋調鳳翔之寶雞永樂庚子以薦驛召至京授翰林編修侍皇太孫讀書甲辰宣宗正位東宮陞右春坊右中允明年得推恩父母妻室宣宗卽尊鴻臚少卿使交趾陞卿庚戌調湖廣按察使以內艱

去乙卯奪情改山西賜璽書遣之公居鄉校居太學  
知尊師取友所與交接者皆敬愛之典教三邑自謂  
師道不易稱禮致宿儒講明經義以求精到從游之  
士多底成效居顯要者有其人在寶雞九年考滿諸  
生奏留之嘗爲四川鄉試考官去取有公論總修陝  
西誌書事有條理人服其學識陞翰林侍經筵再遷  
春坊職輔導從事惟謹在鴻臚恪守禮典奉職無虞  
調湖廣山西達風憲大體劾奏苛暴擒捕奸貪不避  
強禦公孝友母老不能就養請分俸於家恩賜金幣  
必先奉母居喪守禮處兄弟和睦居官守廉嘗持節

王國行冊封禮王所與鞍馬金幣襲衣皆辭不受奉  
使交趾論酋長者三所贈貨寶直千金毫髮無所取  
官舍蕭條無異寒士及卒棺資不能具壽六十有四  
配張氏克甘清澹公無內顧之憂嗚呼士君子遭際  
爲難歿世有聞爲尤難公以經術由師儒薦登禁近  
出掌一道風紀足以行其志遭際四十餘年操行廉  
介始終不渝夫豈聲音笑貌所能爲哉士論居官有  
守者未嘗不稱公宜有聞於歿世也予故以是表其  
墓云

山西按察司副使朱公瑄墓表 吳寬

弘治十一年十月二十四日山西提刑按察司副使  
致仕朱公年八十三而終公有子恩仕于朝爲刑  
部郎中持制服將歸欲得墓文以葬其寮友顧君大  
寧輩偕來以請予與恩以同鄉故相過從久不能違  
也恩旣歸始以江西布政使葉公所爲狀託其友太  
僕少卿劉君來致其意曰公葬期迫矣待此以刻乃  
視其狀敘之朱故通許人也當宋中世之亂從駕南  
渡以松江地僻可避兵難始擇華亭之七寶鎮家焉  
曾祖道華祖士清父愼恒愼恒娶陸氏生公諱瑄字



某別號鈍菴幼有高資總角能賦詩有奇句稍長益  
善記覽入府學爲弟子時廬陵孫先生掌教事適周  
文襄公以巡撫至而提學御史爲彭公二公問弟子  
之類敏者孫先生首以公對試之果然公初習春秋  
孫先生深於詩者更授以詩甫三月卽通其義正統  
三年遂登應天府鄉舉及還其父適自盧龍戍所歸  
父子相見甚歡未幾公當赴禮部試曰吾常以親寓  
遠方不得日侍左右爲恨今復忍違遠乎竟不赴又  
十年始登進士第明年授陝西道監察御史時有北  
虜之變京師戒嚴朝廷命諸將悉兵往禦公以御史

入軍中紀功臨行語其妻王氏曰吾今不能顧家矣  
汝亟歸奉吾親吾惟知有王事而已卽日戎服就道  
諭諸將士以當奮勇死難之義衆皆感激三日虜知  
有備而遁有詔班師蒙宴資甚厚京師旣無事公奉  
旨出巡應天等六郡有知太平縣白玉者連姻中貴  
怙勢爲害公廉得其事卽按以法一時奸貪斂跡屬  
吏肅然於是周文襄公與公猶同行郡稱歎不已歲  
滿代還都御史陳公鑑知其才俾掌三法司事俄丁  
內艱服除擢山西僉事屬吏有不法者聞風而去尤  
累平反冤獄再清軍伍明恕不苛無隱沒誣枉之弊

才名益起凡分巡官缺公輒兼領其事一日至大同  
有中貴親幸者入其境上下驚駭莫知所爲公出郊  
迎之與語其人竟改威而去值大雪欲射獵爲樂公  
曰軍士凍餒不堪必有死者况道泞不便馳逐獨不  
自愛乎遂止一時邊人不至驚擾者公之力也再丁  
外艱服除復任山西人多爲公不樂而公處之自如  
成化五年始擢副使又二年慨然上章請老年五十  
五耳人勸之不顧歸與親友徜徉園池間賦詩飲酒  
相娛樂每以善言訓誡子孫宗族所以力學治家之  
道延師儒于塾鄰里子弟有願學者皆來受業後多

有成材者自少無兄弟惟一姊與其夫俱蚤世遺孤  
子女四人悉爲嫁娶且與治田宅不使失所他所周  
卹人者尤多公自登甲科受官幾五十年而家居者  
幾三十年中間用其子郎中秩滿進階中議大夫贊  
治尹公有六男二女孫男十二當國初其祖士清爲  
邑烏溪大姓趙忠卿旣姪趙以富豪於一方士清逆  
知其家必罹法出居于外以避之後竟保其家人莫  
不賢智之

山西副使吳公道寧墓志銘

何璿

嘉靖十年十一月致仕山西按察司副使吳公以壽終公諱道寧字世安先爲浙溫州之渾頭人國初徙居南京父維成化初任溫縣教諭嘗夢於黃河中流蓋樓因曰吾當於河內起家遂占籍河內焉公自幼篤實無妄言成化丁酉中河南鄉試禮魁戊戌登進士第授鹽山縣知縣迎教諭公以養政暇定省教諭公每舉古語以訓曰但存方寸地畱與子孫耕故公居官恒以慈愛爲本節民財力爲先至於徭役一事尤加用意故復業者接踵而至百姓愛過父母三載

以政績卓異陞監察御史彈劾激揚風裁凜凜弘治  
初年河內民奏開廣濟渠不果行是時公巡鹽河東  
適勘鹽引十萬應否充給河南官軍俸糧公曰俸糧  
吾省利廣濟渠吾府利均爲國家利吾兩成之達諸  
河南撫按後渠成溉民田甚溥巡按眞定等四府貪  
酷望風解綬先是開州有巨寇爲一方深害交結權  
姦莫敢誰何公設法捕獲戮諸市曹人心大快弘治  
十一年陞山西按察司副使奉勅整飭鴈門等三關  
兵備創築寧武新城設寧武所及沿邊堡寨俱募軍  
充實武備一新邊人有賴後以疾辭歸惟以耕讀爲

事每訓子曰汝祖三十以後始發憤讀書或夜無油就月色讀尚能明禮經中式刊文汝俱年富燈火不須營幹正宜努力諸子或不能背書卽掩卷朗誦一遍曰我年六七十尚能背誦汝後生反不能耶諸子感奮力學守中遂登進士第正德初廣濟渠通塞不時公因泝流窮源相度地勢直抵五龍口嘆曰使渠由此而行數世之利也今不二十年而塞蓋創始者失地利耳遂達諸當道違廣濟舊渠三四里許另開利人渠曰舊渠如此故失利新渠如此乃得利刁民百計沮撓往還五年而後渠成水利至今賴之濟水

國初遼府城東流入河公因開利人河見其南流曰  
此古蹟也豈可興今利而忘古利哉達諸當道修架  
橋六座新流從上濟流自下二利並行而不悖林下  
優游三十餘年身體康強未嘗有疾年八十五六時  
每遇別墅花卉春佳秋禾告成不杖觀翫往返步行  
數里臨終不及已事第謂諸子曰汝等不須憂貧但  
教子孫讀書爲上策耳



中憲大夫山西按察司副使馬公應祥墓志銘

王九思

公諱應祥字公順其自謂曰敬湖山人其先山東高苑人也有諱帖木者洪武中以總旗扈秦王就國隸籍西安左衛乃遂爲西安馬氏帖木生子道原有子六人其第四子昇生倫倫生公公自幼穎異成化弘治中爲咸寧縣學生授易笏及羣籍不專記誦而妙契古人作爲文章秀麗奇特獨步一時督學浮梁戴先生與其進上饒婁先生訝其才金華潘先生賞其文蓋嘗策試三秦人物批其卷曰英風凜凜氣凌霄

漢弘治己酉果舉鄉試第二人丙辰舉進士觀政戶部其年秋齋稿金甘肅有以羨餘言者公叱去秋毫無所苟明年丁巳授河內知縣河內素稱難治而是時又乏善令久庶事一切賴廢租賦至數年不完前令苦治竟不完公曰百姓人耳獨河內異耶乃加意撫循之不率教者治之不安筭一人具攷戶數高下之則躬爲編坐奸吏猾胥無隙可進自是租賦完徭役均百廢興詞訟希少豪民斂跡矣暇則課諸生今工部侍郎何粹夫尚未知名公許以爲聖賢之學台輔之器也通渭王宗器先生守懷慶而河內附郭縣

也嘗召公飲食歌咏問民所疾若以弟呼之公禮益  
謙然意有不合輒盡言不少避君子以爲各得其道  
戊午春九思以庶吉士送幼子道河內入其竟民咸  
樂道之至其庭吏縮首立如植視其室服食器用泊  
如也乃賀曰可謂不負公字予曰敬夫充吾志須吾  
民子孫世世思之斯其可耳當道方有旌薦乃明年  
己未夏以母喪歸百姓走送涕泣竟日乃始別去三  
年喪畢辛酉冬改任徽郡歙縣郡考亭故里雖稱文  
獻然俗好氣健訟好交結貴人爭地數尺乃起訟連  
歲費千百金求勝不勝不止又豪家大族搖動禍福

公至持之以靜事求可不枉道徇人久乃自定民有  
探險不輸賦者且五十年公出榜招之曰不來輸賦  
乃坐重役示罰于是諸租賦無敢後期至者郡有殺  
人者久不可得乃以付公公先期齋戒禱越國汪公  
祠下曰神許我得其情則雨是夜果雨翌日啟死者  
棺事中諸人羅跪乃一鼠自棺出鎖跪者一人衣底  
尋忽不見公念曰此神示也乃指其人曰殺人者汝  
其人色動推究果服又郊外殺一人未絕公命移之  
縣大門內許人縱觀之乃一人嗟歎其側者久之因  
扼其吭遂絕是時公已教隸卒覘舉措矣覘者以告

遂執而抵于法益殺人利其財不絕恐或出語故復  
來扼吭耳於是縣中稱爲神明歌頌之今少保臯蘭  
彭先生故參政廣東何子敬相繼守郡咸禮重公巡  
撫都御史巡按御史問勞而舉薦甲子冬北上考績  
比歸之明年乙丑吏部以風憲起公贐饋一無所受  
學士經生隱逸之老以其德政播諸詩歌聯爲巨軸  
附之行李正德丙寅春公行未至有命授吏部稽勲  
主事丁卯調文選是時權貴用事公旣無干謁亦不  
矯激惟知自守旣乃厭棄求歸尚書許公勸畱乃止  
已巳考績上上於是天子勅封其父承德郎文選主

事贈母安人褒嘉之尋陞稽勲署員外郎是時張尚  
質爲尚書欲超拜公公不可張怒陞公湖廣按察僉  
事督學實左遷也庚午春公涖湖廣會當鄉試而湖  
山闊遠兼之卑濕公且病且愈於是校定諸士不能  
徧歷或合數處羣試之場屋事竣方施教約乃明年  
辛未言者以公簡出爲辭遂改督屯河南然鑒別之  
精予奪之公諸士實心服焉于其去也咸惜之而言  
者乃爾不知其何說也至河南數日復以繼母王氏  
之喪歸癸酉喪畢挾其子平畢姻京師有勸公部見  
復官者不聽而還甲戌春部檄改公兵備陳睢在陳

雖一年積贖罪米粟千石及數百金儲諸府庫立之  
卷籍以爲官需至于黜貪汙之吏革濫稅之閹威令  
赫然行矣乃乙亥秋有詔罷陳睢兵備帶銜河南聽  
用公浩然而歸而是時封君病見公喜甚吏部尋檄  
公督屯河南乃封君竟老病卒公得以侍醫藥躬殯  
葬無遺憾焉己卯喪畢復改山西督屯是時屯田子  
粒負欠三四年併行實難公謀諸撫按許他物相準  
卽以給諸士卒甫三月完十六七撫按咨嗟歎異共  
獎其賢庚辰夏以三載考績告行其實托以西歸也  
旣歸之明年辛巳擢山西按察副使公尚堅臥親朋

勸進至曰安石不昃如蒼生何公以天子新卽位不敢虛負努力復行旣至未久入賀萬壽聖節卽上疏乞休益自陳睢後管兩上疏不許至今乃許之公先是買田長安城東爲歸畊之園築望楸之樓建獨笑之堂引濯纓之流構弄月之亭奇葩異草珍果之植質簞之林紛列雜布備遊樂焉未能也而今乃得之喜可知矣歸未久嘉靖壬午繼母杜氏又卒旣葬乃與朋好日遊城東飲酒賦詩公每賦詩搜抉奇巧不驚人不已故平生文章詩所得不多然類非世俗所能也至其愛親友弟曲盡衷悃好賢疾邪擇交寡合



通達治體學堪經濟風流慨慷倏然物表蓋世之英  
三秦豪傑之才也然一僉事十三年不得調既調卽  
歸歸五年乃遂不起距生天順戊寅七月壽六十九  
歲痛哉公平竟若是已矣

山西按察司副使王九峰墓志銘

王九思

壽夫子弟九峰字也蓋嘗自謂白閑山人云先大夫中憲府君諱某配太恭人劉氏生子四男子壽夫其少子也成化己亥六月初一日先大夫仕爲保寧巴學教諭生壽夫教諭舍中是時吾祖高年府君迎夫子巴聞其啼聲喜曰兒當貴我老恨不及見也壽夫生十年而弘治戊申先大夫官滿攜歸鄆杜里舍又二年庚戌先大夫復教諭祥符壽夫隨太恭人入祥符其年秋予禮部下第亦至祥符壽夫乃遂從予受

四書又二年受易及子史性理諸書弄筆爲文章詩  
輒吐奇語又四年丙辰先大夫遷教授南陽府壽夫  
隨入南陽乃從張文粹先生受易又二年戊午予以  
庶吉士送幼子還故里省視南陽壽夫乃遂隨予歸  
試闈中是時遠庵楊先生督學闈中極愛之命以儒  
士入試秋闈乃不第復入南陽卒業文粹所明年已  
未乃隨先大夫丁外艱歸虎谷王先生應韶友張文  
粹益嘗稱之至是求督學闈中按鄆首問壽夫得其  
文大喜命爲學官弟子遂攜入正學書院與高陵呂  
仲木輩親受其業乃舉辛酉鄉試壬戌不第歸乙丑

復不第乃入太學尋復歸省而正德丁卯予在翰林  
爲檢討召之至京晝夜督課之乃明年戊辰舉第二  
甲進士其年冬授河南道試監察御史明年己巳監  
稅蘆溝橋木物其年夏得實授監察御史奉勅巡視  
居庸諸關乃親蒞其地閱其險阻簡其行伍利其器  
物時其練習而凡衛所諸官怠惰者侵漁其下者箠  
戒之不已則參治之其主將才而廉若貪懦者舉劾  
無所嫌避幸邊徼無事得代歸視事道中乃先大夫  
書告被疾例不得歸省自移病乃始得歸其年辛未  
秋也明年壬申予亦罷壽州歸先大夫乃愈益病而

癸酉冬乃遂不起于是壽夫以憂家居至丙子春乃  
除服北上授浙江道監察御史云而其年巡按順天  
諸郡郡多貴戚近幸豪強撓法掣肘不可逞壽夫蕩  
然一無所問旌廉去貪畿內大治明年丁丑得代會  
滿三載考其職稱于是與其妻仝氏受勅封焉而先  
大夫太恭人以予官授封故不及也其年秋駕幸居  
庸詣處壽夫率同列諸君子前後三上疏極諫明年  
戊寅點視團營諸軍尋又點視皇城四門又嘗提他  
道事勤勞甚苦而年資又甚深咸以爲得美陟矣乃  
己卯秋稍遷金華知府云在金華四年明禁令正風

俗清獄訟裁省浮費興作善類鋤去奸惡而主之以  
誠持之以廉行之以公終之以慎尚書蘭溪章公旣  
卒而家貧孤少爲疏請月給米二石其始至郡人或  
易之久乃漸服旣去多思之者于是漁石唐虞佐報  
書曰吾郡乃今始知有壽夫也嘉靖甲申夏蓋嘗考  
績三載吏部以爲績最無過舉御史旌薦者多例給  
誥于是贈父中憲大夫金華府知府母封太恭人妻  
亦封恭人云未幾擢山西按察司副使受勅兵備偏  
頭關諸處其年冬涖代州會當道遇非其禮有去志  
尋聞太恭人病甚于是投劾徑歸蓋涖官未及三月

而代人念之至今以爲可惜其才也歸未久乃遂寢疾丙戌夏四月太恭人華養而六月壽夫竟相繼而逝纔四十八歲耳嗚呼痛哉其古文詩存者無幾與矣疏數篇刻諸木題曰白閣山人遺藁

山西按察司副使程公紳墓表 李舜臣

程公既卒於易通郎舉人鳴伊吾婿也奔赴於易奉迎其喪以歸遂乞銘于提督四夷館太常寺少卿安德盧君將葬也乃復伐石而镌之將刻其大事以示國極舉人以謂余曰茲事也翁其圖之何則知吾父者莫如翁也按志東溟諱紳字伯書東溟其別號也世爲青州樂安人生居南坊一世曰勝二世曰恕三世曰琮俱隱操不仕四世曰玉仕爲真定縣丞配祝氏以弘治甲子九月十六日生東溟東溟生有異質未毀齒已孝敬如成人長而懋學能文嘉靖丁酉領



山東鄉薦明年戊戌舉進士迎母京邸以父不逮養  
爲恨已亥除知山西長治縣事會長治旱甚東溟行  
禱雨城南歸未及城雨大作百姓歡呼歲則大熟壬  
寅擢爲刑部陝西司主事斷獄必以情罪疑者雖詔  
獄亦與平反大司寇聞公深器之三年奏最得贈父  
如其官母封安人適陝西榆林兵備缺銓司以東溟  
名上詔以陝西按察司僉事往蒞之懲債帥剔宿蠹  
軍餉用饒所有羨餘二千餘金盡令貯庫以資犒賞  
無何丁祝安人憂歸督撫楊公薦有真誠爲國恐難  
其繼之語居喪哀毀欲絕勉廬墓側理封樹爲其父

建贈君坊至傾囊不吝起復補河南僉事首令有司  
立社倉練鄉兵一一自校閱大盜李邦珍亂中州河  
洛洶洶獨所屬二十餘處賴以無事壬子六餓出社  
倉粟奚啻數萬計又因汝水開惠民渠利被數縣靈  
寶有巨獄久不決東溟一訊而釋者十人于是撫按  
交薦爲異等癸丑遷山西布政司參議守河東道蒲  
州城西逼黃河河侵勢甚危東溟亟築之數月告成  
事蒲人誦其德以爲萬世永賴者焉蒲俗競侈靡始  
葬非大備不舉往往墓露廢室家中嚴禁約以餘裏  
葬合子女者數千家舊藩畚不與戎務巡撫王公謂

開戎務孰如東漢因檄守要害賊畏威不敢犯守城  
堡二十餘處悉爲保全伏兵及首級一十九夥邊將  
戍卒咸以韓范稱之人爲之立生祠歲時奉祀廷議  
嘉其功于是東漢晉山西按察司副使奉勅總理紫  
荊等關保定等處地方兵備蓋將大用之也先是東  
漢防秋山西勞極病矣茲復念紫荆畿輔重鎮日夜  
營戰守具務在萬全廢寢食者久之忽痰作不救嗚  
呼若東漢謂鞠躬盡瘁而後已非耶東漢生于弘  
治甲子九月十六日卒于嘉靖乙卯七月十九日配  
蔣氏處士蔣淵女在室以靜惠聞年二十適東漢姑

老而孀謹事如嚴父服食必致精潔非其手出不敢  
進朝夕慰藉未嘗頃刻去左右處姊姒和而有禮東  
溟早登第爲名大夫相力居多生弘治乙丑九月九  
日卒嘉靖癸巳正月十八日得春秋二十九贈安人  
繼配崔氏封安人子四長鳴洛先東溟卒娶庠生韓  
卿女次鳴伊鳴南鳴高伊山東壬子舉人娶吾女鳴  
洛鳴伊俱蔣出鳴南鳴高俱崔出女二俱幼未聘孫  
女二長聘鄒平省元陳其蘊子更次許胄元蔣永榮  
子奇鏞鳴伊女也茲以嘉靖丙辰三月十三日合蔣  
安人葬于城西祖塋之次謹撰其大者刻在墓道以

卷之二十一

卷之二十一

三

告勿毀

中憲大夫山西按察司副使胡公賓志銘

余嘗覽鏡中州文獻之傳蓋自兩程兄弟崛起倡明  
以來一時聞而興者若張謝劉呂諸令哲賢智之士  
皆燁然有以表見于當世然一遠師門講習漸異故  
伊川歸自涪陵有皆流于夷之歎而他日寤歎獨謂  
尹氏彥明爲能不失其正斯亦足明執德信道之弗  
易矣其後晚出者往往流于空虛而不足以涉事耦  
變以成天下之務信有如東萊伯恭之所私慨夫學  
不足以涉事耦變而成天下之務此豈儒者之學也  
哉自後浸微熄時有同異至元魯齊許氏幾矣然于

大本一貫無聲無臭之微論者或有遺說焉近世若月川曹氏之醇慤柏齋何氏之貞介浚川王氏之辨擇要不可不謂有志聖人之學者然皆果於自信而近乎墨守則於千聖以來真機正脉猶覺不能無一膜片縷之隔也嘻斯其可易而語哉比蓋見吾滇南君焉君資材英敏鋒穎露拔疑若難於並爲仁者乃取友當世退自省發憤排思惟耻于虛襲而又弗固以滯足以適天下之用而成其務蓋嘗寄我中庸大哉章說洎孟子養氣測語要之獨窺其深而又不能於聖哲之訓是亦足與聞乎斯道矣惜平方見其進

而遽見其止安得不令人重感於材之難成而易折而道之弗易以明且行耶以余之不敏雖亦竊有志焉然擇弗精而行罔篤蓋實自省而惴惴而君之諸子不遠數百里緘詞肅幣猥以墓中之石見屬且曰是先君治命意也嗟呼宛生存歿山川悠遠余安敢不文辭耶公諱賓字汝觀其先江西人六世祖號八公者始徙光而家之因占籍焉八公生添祿添祿生志高永樂癸卯舉明經訓導黎城尊告歸曾祖諱滿雅崇禮讓有父風大父諱球貢受四川雲陽縣令稱循良父諱用中沉毅方正操行學力亦不遇貢受斯



水縣學訓導卒贈徵仕郎兵科給事中如公官奕世  
馴謹表於汝墳公生而穎異自亂兆已能屬文年十  
三選充儒學弟子員卽有聲諸弟子員中考常異等  
領嘉靖辛卯鄉薦錄其文以式多士會母疾不欲上  
春官贈給事公強之再不得已行會試中式稱疾亟  
歸母夫人尋愈乙未廷試賜同進士出身戊戌授行  
人奉詔大名開封諸處開讀己亥祭葬建安王庚  
子拜兵科給事中以謂兵馬國之大事顧令作役而  
諸監工官利其逋逃虐使之誅求日急軍政日壞因  
上疏存恤京師馬駟爲姦利賄通太僕諸役局易

民所俵馬更販鬻馬以大耗辛丑虜大掠山西廷推  
大臣有武備者一人往經略之時被推三人各有難  
色公草疏率諸同列論其臨事避難不忠狀詔罷遣  
有差廷中惺惺推重尋議畿輔保障全恃大行而真  
順懷諸郡枕太行不可無備宜責諸路撫臣豫焉襄  
勅戶部宿軍餉咸切饑務是歲畿內大饑粟踊貴草  
死者多公疏請和糴得發粟十數萬賴所全活甚衆  
壬寅間父病斲水卽上疏陳情赴新水父捐館財八  
日哀號幾仆扶柩以歸襄事如禮甲辰服闋復受兵  
科給事中時有詐僞璽偽撰武臣貼黃者事覺詔遣

公治其事公檢內外貼黃悉覆其弊端疏請遵舊章  
注專職置底簿定揭毀四事積弊以祛人服其識丙  
午詔冊封岷王餽遺一無所受考績轉吏科右給事  
中時都察院副都御史闕員巡撫僉都御史某欲緣  
以入公抗章歷指其奸賊不可任上是其言丁未春  
考察山東布政司某時宰庇之尋推撫遼東公疏詆  
其罪語侵時宰宰怒輒抵公罪左遷亳州判官無幾  
微動顏面比至毫躬敦儉朴帥先僚索暇日與諸生  
發疑論難稽古考德意已聞而來者雲集講下居歲  
餘得量移南京太僕寺丞丞固無事時與余坐卿邸

濯庶子泉商論學術嘆士習之益卑所聞繁世道至  
不細或相與切磋砥礪庚戌擢山西僉事會當防秋  
急詣繁峙激厲將士督修城堡嚴守備大爲總督許  
公默齋所器重壬子冬聞母夫人喪卽日奔歸乙卯  
起除陝西僉事兵備寧夏兼管糧儲先是糧不宿儲  
至失時翔貴丙辰又大饑軍告急公爲稍增估直以  
致之期月致穀十數萬斛賀蘭山東故無城堡虜得  
恣出沒擾人病耕公按尋前人基緒嚴督併功延袤  
可數百里虜不得馳民狎于野鎮人劉西崖太叅爲  
文頌之晉本省布政使司叅議分守關南駐金州去

軍夏之日軍民環泣遮道至不得行公爲泣下去至  
金在萬山中居民犢悍百務弛廢公欲事立痛繩以  
法檢行縣廉得漢陰白河兩令不法狀按如法諸邑  
肅然敬憚之民有趙打虎者坐征紫陽山賊功不賞  
怨望謂征倭不行公悉械致其衆宣示威福激以忠  
義咸願箝自贖乃各箝四十隨第行功賞趙因感泣  
奉惟謹盜爲屏息境內無事時誨諸生衍衍忘倦宛  
如判毫時丁巳春陞山西副使去金之日士民泣送  
如去夏而諸生中至有羸糧追送四五百里外者夏  
五月取道過家上塚與親賓讌集共歡世方望其大

有爲而意倦於行乃七月疾作八月二十有四日卒  
矣卒之朝猶強起整衣端坐詳定殯議訓戒諸子其  
精爽不亂如此公爲人莊重立朝無所附麗在諫垣  
侃侃正論見憚同列闔門視草務在勿欺一日草劾  
布政某鴉聲甚惡至墜廳事公竟上之其搏擊不避  
禍患類若此居外藩務持憲體引大義不詭隨臺史  
意旨故臺史不甚汲引之然公論著性尤孝友恒以  
父日不及養而母老養不能迎故數任不攜家常憂  
弟賢多病爲分俸置產令自適唯厚族黨時推其餘  
以相贍與朋友交重然諾有信義不能如葬者率助

之好德如飴聞善卽拜以故海內多士多樂與之交  
嗟乎公以奉職持論遭讒被斥財一振起卽復長逝  
懷濟世安人之略而弗竟其施抱鞠躬陳力之心而  
迄已焉位旣不酬其勞而年又不副其德君子不能  
無惑於天夢夢也

山西按察司副使劉公涇墓表

隆慶元年冬故山西按察司副使次山劉公卒且踰年其孤某某千里緘書以父友某大尹狀投余請余表其墓時余方在告且駭且悲自念余知公二十餘年雖病不克爲然公生平大節誰當爲之表白者遂力疾書之以授其子俾鏡諸石云按狀公諱涇字某別號次山其先常州靖江人也國初諱某者從征迤北編伍懷慶衛故今爲河南人父某母某氏以正德庚午生公生自祖父以上世業耕讀至公始起家進士余初校士禮闈得公卷脫去浮華而體要具存



心奇之既數從燕見訪公家世父固朴茂長者公少承父訓長游柏齋何公之門講性命之學乃知公之醇厚不浮得之父師者固多也既入史館讀中秘書者三年學益進既授貴州道監察御史初奉命清戎順天故事謫戍者非薄類編發遠方歲煩清勾類多逋逃無補軍政公職清戎時胡虜寇掠士伍空虛公計以寇方在近且徵兵於遠而畿輔之民顧使之謫戍遠方非所以實畿輔壯根本也乃疏請發戍遼薊邊益新軍而民免遠行疏入報可迄今施行時上役未休工部以順天所屬積欠料價數多請兼委清戎

倅嚴督翰辦公復奏以民新被虜患方急撫摩願以  
數十年之逋而責之一旦人將不安執政聽之專遂  
寢公之臨事敢言有補國是者多類此後按滇南適  
沐國公保勘襲爵之後時權奸構扇人心皇皇沐氏  
幾搖公至則鎮以安靜廣綏懷釋疑貳約束一新故  
事遠方遙用頗輕官不得人易以階亂公奏請視內  
地叅用進士又念遠方文教頗微民不知禮請增廣  
解額以作士心人遂悅服事畢復命諸所舉劾小大  
悉協輿論方圖建白中途乃擢知鳳翔府公念地震  
之後民多蕩析乃加意拊循事稍煩民者悉爲破除

暇則進士子課教之士民始欣欣有生色未報政以  
父憂去民間公去如失父母奔擁扶送者百里不絕  
服闋補任登州公治登如鳳翔先時遼東饑賑濟爲  
難建議者請寬海禁聽民市糴于登萊後遂聚衆商  
販勢不可止至有挺刃相戕者公憂之上書政府恐  
以一時之權而啟異日之患政府嘉其慮不在近市  
糴遂止在登三年晉山西按察副使整飭潞安兵備  
分巡冀南嘗與防秋駐師雲中八角堡時虜入犯激  
衆固守以身爲長城屹不可動虜遂遠巡退去朝議  
方擬公可屬大事言者不察誤以公前保沭國公事

疵之公殊不辯遂落職歸夫沐氏累朝封植俾鎮南  
夷不幸繼嗣中微當事者顧視以爲奇貨因其隙而  
搖撼之沐氏誠不足惜獨不爲一方安危惜耶公不  
妄附和獨持大體而更以蒙詆必有能諒之者矣余  
嘗謂學不必仕惟有聞于道仕不必顯惟有補于國  
衆不必信惟無愧于心公少學於柏齋何先生以知  
自立既舉進士由史館授御史所建白率據經遠既  
補邵守公不以爲意撫民必賑其急計事必防其微  
既督臬司籌邊事尤能身扞虜衝公之服官亦何負  
于國乎卒被浮言公略無怨尤惟建家塾教子弟與

器物蕭然此可以知公矣余初識公時有子四人其  
二人以先公卒豈天之報善亦不可知耶悲夫悲夫  
余故備書之庶後之欲知公者有考云

山西按察司副使南公逢吉志銘

馬自強

姜泉南公渭南人也諱逢吉字元真一字元命別號以豐原之泉名故學者稱姜泉先生其先由河東中條徙蒲城元季有諱安義者始徙渭南秦村家焉故今爲渭南人安義生儼儼生言言生珪珪生渭陽公金渭陽公孝友篤信其施用以文學官不大究配焦太宜人生二子卽瑞泉公與公云公生而穎慧不倫九歲通小戴氏大義渭陽公之司訓新野也沁水常公守鄧州常公名家以大小戴氏而子倫又負異才

當是時公以總角同瑞泉公受常公學而友其子並  
有逸羣之譽焉後公舉於鄉第三人時大復何公試  
公文嘆曰奇才也計當魁禮已果然先瑞泉公先公  
八年成進士爲戶部郎至是出知紹興府公會試不  
第同奉焦太宜人之紹興並師事陽明王公瑞泉公  
以直黜陽明致書曰關中自橫渠後有所振發興起  
而進於道德聖賢者將必自吾元善昆季始故二公  
所化誨至今渭南彬彬多文學有用之士焉公以易  
舉進士高第授禮部儀制主事瑞泉公卽世公慟甚  
草疏乞歸葬疏且上會有冊封命得取道襄事公在

禮曹時陽峰張公鍾石費公存齋徐公相繼爲宗伯  
仰贊太廟明堂諸大禮以備一代獨偉之典而當  
肅皇帝意其屬草多出公手在禮部七年文選郎忌  
公才出知保寧府無何選郎被劾下獄劾疏中首舉  
枉公爲證保寧任罷又公私冗奸不可詰公振偷剝  
蠹祛故張新與之更始暇則課諸生萃諸校之僞而  
督教之一時得人爲盛舉人傳太者有隱操上官率  
不爲禮公獨式其廬而問焉諸驛傳徭役里甲民兵  
悉有定畫義民史俊輩以捕盜爲盜誣論死者十一  
人寃十餘年莫雪者公一訊雪之萬口歸明在保寧



四年獨用嚴治巨室銜者造飛語中公聞陞雲南督學副使命猶以守入覲會有佐前銜者遂改知歸德府歸德以州陞又新造當三省之交其難倍保寧公治歸德如治保寧陞兵備鴈門鴈門者三晉阨塞巨鎮也往兵備以督撫總兵在日唯飾具需遷公獨慨然曰陣法不習匪我制虜虜寔制我今之邊弊有甚於此者乎於是諭三關將士如令甲習之又按志盡復其演武場爲豪家據者當是時三關未分部也獨數巡行三關外軍聲大振一日山下有牧虜數十騎望見公于旄來知有備輒強云其爲虜憚如此又嘗

條 上備邊便宜五事詞多觸忌諱執政不之喜格  
弗上乃考察用前飛語罷時長子軒舉進士爲翰林  
吉士後奏銓部主事績上書詔許公以原官致仕贈  
李宜人爲恭人自是凡以考績得復父原職者自公  
始公事父母孝師事瑞泉公竟其世無異財裒產則  
盡以父兄所貽讓孀嫂遺孤嘗損地十數畝爲義倉  
輸粟以振族之乏者石疊李中丞公憲友也嘗約婚  
不果及李卒公喟然曰夙有言余可幽明負耶遂許  
之乙卯關中地大震兇徒乘之鳴張四掠勢如燎原  
公乃糾邑壯士得數百人激以大義諸壯士無不人

人奮也是日擒殺倡亂者四境以寧富家被掠子張  
進英夜持數百金匿公所會進英與其在抱子俱亡  
金無歸也公舉原封首官曰其以此助孔廟工當道  
義而表其里以風示一方建姜泉書院收訓其子姓  
門人接引後學如弗及已已邑不歲公焚券數十又  
輸粟數百石於官賑全活者衆鄉人德之公骨氣鋒  
稜峻潔而剛明果斷故其行誼種種合道至臨事變  
屹不爲動升沉等之浮漚爲兵備時有窺當塗意勸  
公通問者公曰出處有命吾惟信心俟之可枉已徇  
人爲耶嗟嗟以遠蒿如公使稍自抑以求庸於時所

樹立詎止是而顧不然吾於茲益足以見公矣公年  
八十猶能夜作細字出人不杖風神軒軒若霞舉  
穆廟嗣服進階中憲大夫今上嗣服復進階中議  
大夫贊治尹詩文希盛唐兩漢所著有姜泉集越中  
紀傳若干卷藏於家註解會稽三賦刻在會稽郡中  
享年八十一

山西副使趙公祖元志銘

陸可敎

趙叔子伯一數千里走京師以其先憲副南菴公葬  
銘爲請曰先君子棄諸孤七年於此矣唯是寃窆之  
事無以藉手敢告予自垂髫時獲侍公而予女兄實  
歸伯一氏義不可辭謹按狀而銘之公諱祖元字宗  
仁別號南菴婺之東陽人也曾祖曰以杰祖曰濂父  
曰繼宋以公貴贈刑部員外郎母曰吳宜人贈公善  
教子至減產貲書而公故奇頌自負遂周覽六籍若  
諸子百家言尤精經生業每試輒屈其邑諸生唯邑  
諸生亦靡不人人心遜也遂以嘉靖癸卯舉於鄉明

年成進士而公雅志厭薄吏事疏請得教授江西之吉安吉安故稱人士淵藪而是時羅太史洪先鄭君酒守益皆以講學家居公率郡諸生日就請益無不灑然自奮者居久之遷國子助教又二年遷刑部主事俸轉員外郎以執法格用事貴臣得仇直聲又二年出檢山西按察司事丙辰地震河東蒲州境覆壓過半盜乘之蜩起抄劫盡行公設方略解散其黨而悉籍其金錢之無主者數十萬官貯之且用新其城塹境以無事俄遷江西參議公治之如山西扶滿復遷山西兵備副使丁吳宜人憂以歸先是公族弟太

史祖鵬女歸太保陸炳炳以貴倖帥纓騎勢甚張自  
相嚮以下咸目攝之故炳死而太史斥公及其季刑  
部員外郎新菴公皆坐黨罷矣而論者亦遂以是併  
訾公吁悲乎夫世人夸權騖利抵間投足豈復遺力  
而讓進哉以故嚴陸方貴幸時諸蠅附士率蠟數資  
被顯擢而公歷官二十餘年僅止副使公歿而諸子  
蕭然食貧至貿資稱貸以償所遺子錢而公又故與  
太史不相取齟齬至歿身也由此觀之世人耳論豈  
足憑哉而狀又稱公事吳宜人至孝遇邑族康直不  
阿歸罷二十年有以自守泊如也要皆不足槩公故

爲辨其大者如此



劉珏傳

劉珏字廷美長洲人宣德中郡守况鍾簡名家子爲  
掾珏在選中珏言有志於學不願爲吏鍾嘉其志遣  
補縣學生遂領應天鄉薦授刑部主事遷山西按察  
僉事提督屯田年甫五十懇乞致仕珏性孝友恭謹  
未嘗失色於人然操履清白人不得以私干之至於  
好學之心老而不倦尤工唐律對偶清麗當時稱爲  
劉八句行草師李邕畫師王叔明皆能得人筆意所  
著詩曰完菴集

山西按察司僉事孫博傳

石珩

孫博字約之河間景州人也倜儻有志節通毛詩傳  
極羣籍尤精語孟酣飮沉潛著爲論說深得聖賢之  
指諸儒競傳誦之釋褐爲歷城教諭登進士授禮科  
給事中論事不避強梗聲振瑣闥成化庚子汪直用  
事立西廠密令左右親校覘察公卿以下官得失輒  
注考語乘間聞奏有所黜陟或徑自捕繫考鞫内外  
恐囂里巷細人爭詣廠污讎官吏權柄下移謁私門  
行苞苴者益大起博上疏論直盜弄國柄作福作威  
使君相廢職漸不可長疏入上令毀西廠直大恨之

會北虜寇雲中直與都御史王越保國公朱永受詔  
北伐將圍營軍五萬人出山後直乃奏用博紀官軍  
功陰欲中傷縉紳危之博曰論諫吾職也榮辱生死  
命也將安避乎遂行既抵雲中虜勢猖獗每出戰輒  
令紀功官隨行營博雖書生意氣峭拔兜鍪繡襖  
兩石弧馳突萬衆間如健將時或聚議機務益侃侃  
雄辯指畫利害不少挫衄直始心敬之越亦從旁時  
時救護得不死師還論功陞山西按察司僉事博既  
禁闔舊臣又襟韻疏暢居法司鬱鬱不得志會當道  
時欲有所指撻遂乞致仕還鄉里茅茨蕭然未嘗有

戚色日役蒼頭課田園或遇故人賓客觴咏不倦凡仕宦至景州者猶時時勞問弘治甲子知州馬某貪虐毒民博諫之不懌遂以事侵之博發憤詣京師論其罪惡及人命十餘事得賜詔獄問且遣使者詣州覈實知州度不可解乃佯爲謝罪置酒毒死聞者莫不憤嘆初公且死囑其夫人曰吾以孤直不容于朝幸奉先人之業得休息田畝教誨子弟百無所恨今乃爲羣小所害命也夫我死勿埋吾屍庶幾朝廷覺悟得爲百姓除暴去亂吾且含笑地下矣遂死馬後竟伏誅太史氏曰先子按察晉陽嘗與孫公爲寮案

璫兄弟又嘗侍几杖質問九經親見其爲人卓犖  
爽有古國士之風然慮事不欲爲太深又不設城衛  
故始以此立節中以此去位終以此致死語曰直如  
弦死道邊信然哉

山西按察司僉事暢君華墓志銘 康海

君諱華字子實其先臨汾人也曾祖和甫商遊於秦  
子孫世爲隴西人祖茂永樂甲午舉人拜陽谷令今  
祀于鄉賢祠父祿以國子生拜孟津簿卓有政聲改  
簿祥符後又以君貴贈承德郎刑部主事母蒙氏封  
太安人君資性偉異六歲卽知學有奇志祥符君曰  
予有官不能行志有祿不逮養親生子若是胡以卑  
官役役于人哉遂致事歸而君爲生員極爲遠菴先  
生所重從學者日至其門果領弘治甲子鄉舉閱年  
祥符君卒君哀毀過禮終制舉正德丁丑進士拜無

錫知縣與滯補弊廢事畢舉撫按交薦其能嘉靖癸未擢刑部廣東司主事論刑明允戊子奉命決獄畿內平反實多尋陞刑部福建司員外郎己丑復奉命審錄平反一如畿內有疏論條例繁難未報丁內艱歸服除庚寅陞山西按察司僉事值岢嵐寇發官莫能制撫按以君往君往不旬日渠魁悉殄脅從盡釋撫按以功上賞段二疋銀十兩撫按又以河東道果值凶荒請勅專以公分巡河東道弭盜安民時論偉焉有倡白蓮教者君取其人至以禍福禮義諭之其人感泣卽散去後倚氏有爲此教者誅戮不可勝言

人乃知君曲突徙薪之恩博矣僉事三年撫按牒交  
上而陞遷且邇君曰年將六十西山日薄盍歸乎來  
于是累疏乞休勅下吏部吏部以爲暢華廉能素著  
累次告休情非得已 上始允之



山西按察司僉事喬公岱墓志銘

李開先

喬公諱岱字希中先世棲霞縣人也諱大堅者以元  
亂避地於章丘今爲章丘人云大堅生明德明德生  
木邑人稱竹軒先生正統辛酉中禮魁官郕府左長  
史木生奉先邑人稱松菊先生成化辛卯亦中禮魁  
官秦府右長史奉先娶楚氏生公公生而內顧外秀  
眉宇疎朗神采煥發弘治辛酉公仍以禮經魁多士  
先是有夢兆三世魁名至此始驗矣然俱第五人且  
當辛年亦異已壬戌第進士除行人司行人以公差

過歷下時尹冢宰方謝政閑居遙望卽嘆曰十年前  
已知其有今日且眼見君家三世矣差滿選授四川  
道御史出按兩浙鹽政頗有攬轡埋輪之志鹽場有  
偵事者飛章劾退數人時逆瑾盜弄威權侵牟鹽利  
以不副其望降謫太平府教授科條整肅校藝精詳  
太平之士咸稱之曰真嚴師而具法眼者也及遷鈞  
州州判流賊勢正猖獗數萬精騎一時至城下州乃  
宗藩所居民庶而富賊必欲破之以取其有公乃率  
衆登陴抵死拒守閱八日始解嚴月餘陞永城知縣  
兵火之後城隍殘破庫藏空虛將欲修城浚隄苦無

以爲償工費忽羣卒懽呼走報曰城堤掘土得銀多  
不可言乃往取之共有萬數自是城隍堅深樓櫓嚴  
壯繕甲整戈操習武事人人有更生之望不復轉而  
乏他矣年餘以才可投繁調轉廬陵知縣縣號健訟  
難治多方詳審兩造單詞勿聽往特善于把持者率  
逃之外境縣稱一治撫按交薦縣治與永豐封土相  
連亂寇蜂起攻掠鄉村破散儲積居民四走無敢擾  
其鋒者都臺洪公檄下屬公勦捕乃用計設奇悉就  
撲滅捷音奏朝蒙有獎勅銀牌之賜方其未至縣也  
旱而且風已五六月矣秋禾乾瘁民有憂色視篆後

雲如結雨如注四郊霑足偃禾盡起間里慶幸而歌  
曰前在永城天賜銀而城成今在廬陵天賜雨而禾  
興蓋有以德及人故無往而不天也年餘陞廣德知  
州尋陞瑞州府府同知專理軍政屢爲清軍者倚任以  
爲今之古能吏也凡承委務竭心力逃軍之巧於影  
射者無不勾稽解送嘗云例雖有挨無除免此弊端  
所由起也司府後湖冊籍久將爲虛具矣其每事不  
苟類如此三年將考績關白所司已得請矣會松菊  
計至奔而還家以喪禮自閑服闋上京欲援尹繼祖  
事例奏乞德府長史同年有李孔教者碎其疏且戲

之曰君已世魁又將世官耶公曰向者在道同邑一時四人繼而一人懷忌相次遷謫只今同鄉猶不扶持當路似有譖毀不如陪遊獵于王孫步塵蹤于賈傳也天部有知其淹者推陞山西按察司僉事命下適國有慶賀事容臺榜示外寮在京者各具吉服趨朝公買一豸衣崔縫人連夜紉綴因手之太息士尚記正德初年降官將行其原排擠我者遣一悍僕持拜簡索借豸衣曰今已無用何不付吾主人翁耶幸蒙洪造今復衣豸衣索衣者磨滅久矣天道好還豈非士大夫之永鑒哉公往山西提督屯種帶管河東

道平日長于刑名又歷任歲深事無巨細莫不處理而解州縣吏民有事案下者或不解行囊卽決斷歸矣癸未以母老休致其從兄繼志亦官崇府長史若補三世之數者詎非奇之又奇哉

僉事孫公璽墓志銘

唐順之

公諱璽字朝信嘉興平湖人也其先世徙自松江之華亭所居南有九峰東有盛溪因自號峯溪道人弘治辛酉舉浙江鄉試登正德戊辰進士除興化知縣四年陞揚州府同知幾年陞南京宗人府經歷尋丁外艱服除陞山東按察司僉事提督京畿屯餉調雲南僉事坐撫按搆怨奏逮二司是時公已陞山西參議矣仍落山西僉事乙未朝覲之歲以老罷歸最前後仕途二十八年歸十年而卒年七十有一嘉靖甲辰六月二日也公爲人寬厚持重內剛外和其所居

官不擇劇易不計利害智巧所避毅然任之其有蹉  
跌亦不爲悔嘗言興利易而除害難然除害所以興  
利也其在興化興化豪徐恩與其宗人交賂權貴猾  
賊邑中恩以白衣入粟補興化所于戶綰所印而所  
中諸世千戶反悒悒出恩下不敢喘令丞左右亦多  
爲恩耳目者率常把令丞陰事令丞欲圖恩懼不能  
制得反噬公始至恩繡袍背持刺上謁公拒卻之然  
亦未遽誦言罪恩也而邑人亦無敢告言恩者乃稍  
稍以輕罪笞其一二宗人以風指百姓百姓乃敢告  
恩最後得其謀殺道姑攫財事遂密擒恩獄中考按



盡得恩與其宗人諸不法狀因繫殺恩而宗人坐死者數人邑中爲清公始至邑歲饑捐公廩代民輸自是孜孜民隱平徭清賦養老長孤居數年邑以治稱去之日邑人攀擁不得行而徐豪家獨銜公不已伺公去卽持金數千走京師賂閣宦瑞斬反其獄且中公奏下巡鹽張御史正德時諸閣專而瑞尤有名所謂瑞張也御史顧望窮索公過失數月不得則令公與豪家同囚繫困辱之乃爲書抵御史其語深切抉摘御史隱曲御史得書大慙惡竟引疾去後代者至踰年其事乃白而爲揚州府同知楊興化所屬郡也

始御史之勘徐豫也以屬淮安守某盱眙令某咸受賂說法巧詆公罪不克至是兩人爲他御史所論公又往勘之罪不至罷卒從減論後兩人愧謝公公絕口不道前事人益以爲長者同知職清軍而軍解失文據者例充軍時解人當坐者若干人公請于上官以爲軍一人則解者二人解者軍則別解者又四人矣牽連無已時請限以一月首免別給文以行便上官下其法所部郡邑爲例頃之淮揚饑公往賑泰州所活凡三萬餘人是時宸濠反江西攻安慶公奉檄守儀真扼江之衝捕儀賓之爲謀者與其黨十餘人

敕旌其功嘗以僉事奉命丈皇莊草場地土清其地  
之爲奄戚所漁奪者悉歸之民薊州銀冶盜嘯聚千  
餘乘利據險爲患公攝兵備選能吏馳上山寨榜示  
禍福各自縛詣公公罪其首餘牒遣復業及徙雲南  
分巡洱海道麗江土官川蜀爭金沙江警殺公會勘  
其事土官以土金賂同勘者久伺卒莫敢賂公由此  
解警奉約束如故大同經兩亂後卒伍驕悍少不當  
意輒負怙跳踴以爲常公以山西僉事巡大同盡心  
撫馭人賴安堵頃之吉囊入寇斬首多以贊畫功賜  
金自爲令卽力薰大豪及在薊州洱海大同倥傯盜

賊蠻夷反側兵戈之間而勤地土時則尤以一文吏  
與貂璫肺腑爭氣力上下公處之未嘗不辦竟以不  
能俯仰故不至大官在山西嘗衣豸衣見巡按巡按  
怒以爲慢已因考察中之遂以罷自知縣徙同知自  
同知徙經歷也亦坐不能曲事鄉大夫之有力者故  
卒爲所擠尤不喜通權貴人爲山東僉事時以屯田  
居京師久之永嘉張公爲相故交也同年桂公爲冢  
宰未嘗一私伺其門以是往往齟齬于世至其清修  
之節則人亦不得而疵也總兵某嘗問餽寶帶鈎不  
散封而還之雲南夷俗巡守行部輒有饋獻納則喜

拒則疑且恚公拒之卒無敢疑且恚者大理經歷以鄉人故潛置倉石文書篋中假公移投入公亦潛還之不發其事平生自俸貲外無所取其俸貲亦多以散諸宗姻族卒之日篋笥敝衣而已性尤喜詩自罷歸居閑則詩益多有雲山履歷稿藏于家公之先諱某者居華亭國初被薦署縣學教諭事至公之祖諱忠自華亭徙平湖者也父諱軒封宗人府經歷母張氏贈宜人子女各一人子植舉進士爲刑部主事植始聞公病脾疏請歸養歸踰年而公卒將葬植來請銘余以未及識公固辭植曰余先君則知子矣先君

每誦子之文而得子之爲人恨老不及見子此行蓋  
先君意也因涕泣因請嗟乎余何足以辱公之知而  
亦烏能有述于公也哉于是按公之壻禮部員外郎  
錢萱所爲狀與公所上張御史書論徐豪事而次序  
之不散增損焉懼失實也銘曰嗟嗟腊肉或遇之毒  
終利用獄盤桓居貞有膏其屯卒困于臂嗚呼古稱  
巧宦四至九卿公豈其拙我則是銘

記張僉憲時龍門之戰

林大春

張僉憲名時字宗易保定易州人也少與楊太常繼盛同學楊兄事之嘉靖中先後舉進士楊拜南京吏部主事稍遷員外而張君方待次公車會北虜入寇長驅薄都城下京師戒嚴君倡言于當事者請與虜決戰時不能用虜退復來以入貢爲名大將軍驚上言請令塞上得納胡馬因稍易以緡帛塞南侵之望詔許之其年楊適入考調兵部客于張君所遂草疏劾僉憲誤國不道以稿示君君曰此疏正不可少第必無聽如聽之將令爲之當誰屬乎楊曰請以屬子某

有死以報國而已君勃然作色曰大丈夫死必濟國  
家事豈徒死耶因私往見陸太傅炳說曰大將軍議  
開馬市楊員外以職事宜言主上幸而見原大善有  
如聖怒不測使漢有殺計臣之名爲夷狄笑竊爲大  
將軍不取也此其責宜在太傅太傅深然之及疏上  
下楊繼盛詔獄責問坐謫邊尉不得死後歲餘鸞伏  
誅楊復召還兵部甫至京十九日又坐劾奏嚴氏父  
子事論棄市先是楊旣之邊君亦尋以憂免至聞楊  
召還諫死獨恨弗能救又復自念業已往卽救俱死  
無爲也因爲之發喪于易水之上而服焉且爲力存



其後或問君與楊子異乎答曰昔者伯夷太公兩人者同歸周豈其志不同哉然而孟津之會尚父薦揚夷齊叩馬彼固各有謂耳其後六年丁巳服闋補刑部主事有詔令大臣各舉才堪邊寄者以聞於是九卿中三疏薦君調職方主事其年奉使徵兵入衛西自秦中還上邊事因言故將某某可用從之己未遷員外郎尋出爲山西按察僉事備兵獨石是時邊戎久空動倚客兵爲援其實首鼠伏匿不敢戰所過騷然不寧邊民苦焉君乃始請罷客兵復屯戍稍益募壯士教練之久之西北傳來烽言虜酋黃台吉且入

寇君私與部將計曰虜人必先掠龍門龍門者宣府之右臂也龍門失守虜必乘勝南下逼近紅門此其爲患不小乃自選騎卒得七百餘人趨援龍門俄而虜果大至凡數萬會日暮分屯夾道爲營營長可數十里君復私計曰虜至不知我有備且賊雖衆屯夾道道狹難猝聚可掩擊也因出死士數十人夜襲虜營營中大亂首尾不得相救盡獲騾馬牛羊以歸台吉聞之大駭黎明悉衆來攻龍門君令集民間車環以爲營以五色綵繒畫龍文衣車上山城中老弱守之而以精騎自將而前與台吉戰大破台吉兵于龍

門之野我兵銳甚往往馳戟入虜壁斬騎將騎墜輒  
刺殺之有捕虜者謂台吉言我累歲盜邊莫我抗今  
若此固憤不肯退及遙望見後車車盡五綵龍文勢  
甚壯望之如山業思爲遁計適城中樵夫爲虜所得  
問得虛車狀虜乃大笑復奮我兵猶殊死戰不可敗  
相持至暮所擊殺無數我兵死者亦百數十人虜因  
罷去卒保龍門林子曰余觀張君所將破虜士僅七  
百人可謂壯矣豈李陵所謂荆楚之奇材劍客勇士  
耶何其能以少擊衆如此也往余在京師客從塞上  
來爲余言張君陣龍門事甚備余故悉記之大抵君

平生與人忠遇事智見義勇其待士也嚴而有恩臨  
難不避以身先之此其所爲能得士之死力有以也  
論者謂其輕敵寡謀致顛越于我師又却客兵不用  
以至無成功竟下兵部議坐貶

太原府知府張公賢傳

李 濂

張公賢字堯臣別號任真子祥符人也曾大父子初  
大父敬父揮世服賈善厥家母段氏夜夢神人送袍  
笏金帶至其舍覺而生公公自幼聰穎過人務學勤  
苦每旦昧爽起朗誦經史竟日不絕聲夜則閉目默  
誦不近燈火或諷其夜讀公曰吾見爲學者晝嬉游  
間輟而乃夜費膏油非徒欺人亦自欺已吾不爲也  
治尚書知名郡中有道士相之曰子甲科中人也必  
貴顯年至五十不必仕可惜無子公年二十五領河  
南成化丁酉鄉薦戊戌辛丑會試俱不第卒業太學

癸卯冬十月汴藩左布政眉州吳公節張宴餞省城  
諸舉子赴南省試而孫教授錦雅與吳相善亦在坐  
吳私謂孫曰諸子明春登第者幾人孫曰以錦度之  
無可決料者曰何以知之曰諸子役役人事間功疎  
而文澁無已其惟張賢乎斯人尚在太學未歸耳明  
年甲辰三月春榜報至省城會試者止中公一人由  
是吳奇孫爲知人公旣登第以戚里弗內補出知山  
東之單縣時邑人有在京爲權要官者厥子暴橫里  
中強姦妻女財產前令莫能制公至擒縛之榜笞  
無完膚竟正諸法邑內肅然將三載母歿守制還汴

服闋改知海豐僅八月父沒守制還服闋改知山西之襄陵境內有山泉可灌田久爲臨汾勢家所據襄陵人不得占其利公奪返之邑人立生祠祀公弘治丁巳擢陝西慶陽府同知在任九年興利除害不畏強禦法所當爲者生死以之入莫敢撓都御史楊公一清周公季麟咸薦之乙丑擢四川順慶府知府公下車清理累歲滯囚囹圄空虛事干權勢難結者當道必以屬公公亦不辭避分守張參議官發贖罪紙下岳池縣製造川扇民苦于賄價公聞知移書已之宦怒中傷公公遂暴其事于巡按胡御史賜賜具奏

以同時逆瑾用事傳旨兩罷之正德庚午瑾誅而楊公一清時爲冢宰素重公復起爲山西太原府知府公之至太原也慙直如在順慶時虜犯太原居民震恐有陳憲使者同諸寮夜飲宗室第公單騎往叩門呼曰虜患孔棘非燕飲時也矧時例有禁爲法吏顧昧之耶坐是不合于當道乃謝病歸時年五十竟如道士言公憇愜寡容平生以輒熟諛諂爲深恥人有持詩文示公者公指摘瑕疵盡言無所諱人多怒而去曩正德辛未公在京邸汴舉子會試南省者幾四十人以公爲舉業著蔡咸誦場中作質公公悉不許



已而曰士貴實學諸君藝未精何敢與天下多士角  
後生多罵晉之旣揭曉視之果無一人登第者衆始  
服公之藻鑑云里中爲語曰言不諛人張堯臣公卒  
年六十有二無子所著有二渠巴語名賢珠玉今板  
刻亡矣

政平州知州何忠傳

何忠字廷臣江陵人舉進士爲監察御史有能名承  
樂中以言事陞政平州知州忠聰敏有政事才居官  
廉慎不妄交處爲御史持正論莫敢于以私當言事  
時忠以疾家居衆御史以所言事示之忠爲增損皆  
切于事情爲州民心翕然安其政雖深谷蠻酋素頑  
獷者亦樂于趨事後以計事至布政司寧橋之敗賊  
乘勝進逼城下人心惶懼成山侯王通詭謀與賊和  
爲書遣山壽家人遺賊謂朝廷宥其罪賊果信引兵  
退先是密遣人奏事俱被賊遮畱至是賊以朝廷宥

罪遣頭目陳涓老等奉表謝恩通遂遣忠及千戶樓  
勝託以奉還地方與涓老同入朝實欲上達賊情請  
益兵征勦至昌江內使徐訓泄其謀忠等遂被拘留  
賊素聞忠剛介有學識數以甘言美職誘令從已忠  
不聽後以刀鋸臨忠曰從則生不從則死忠瞋目視  
賊大罵曰我天朝臣子恨不斬汝以歸報朝廷肯從  
汝反求活耶罵不絕口又以刃逼勝勝亦不屈忠父  
子及勝同日俱遇害時宣德三年五月忠初被拘卽  
賦詩以死自誓云

知州呂昭傳

呂昭字克明崑山人嗜學敦行洪武中以薦授徐州訓導上疏言民事稱旨改浦城縣丞縣多荒地昭以俸資市穀給無產者俾藝其地而不責其償縣以富庶永樂中陞沁州知州父老持金爲贈皆謝却之然僅至杭已不能顧舟狼狽而歸比赴沁道出徐州天寒尚未挾纊故所授經弟子共爲買一毛裘顧一履以往其子旦旣舉進士昭遺書戒之曰進士美官然不能廉終非吾子死亦不飲汝祀其廉戒如此旦字寅伯初任河南按察司僉事以事去職後以薦起爲

建昌府推官正統間致仕性亦高潔環堵蕭然未嘗  
以貧窶爲意及卒不能喪蕭山魏文靖公驥遣人買  
棺斂之

絳州知州王公汝積墓表

薛瑄

奉直大夫知絳州王公汝積沒之四年爲景泰四年其子佐奉狀自江西走京師謁余請表諸墓按狀公先世居鍾陵其大父諱忠宋末爲金谿場官因家焉今爲金谿人自曾大父復茂至其考處士仲允比三世皆韜德弗耀處士娶林氏有婦行生公質異凡兒處士識其他日必有立自童時卽遣從邑庠良師友讀書砥行爲儒者事公果能專心一力進修不怠比一薦卽榜前列春官會試得分攷福建政和公以師道自勵勸于誨人出其門而登仕版者甚衆九年放

有成績至京師大臣薦其才可治民遂陞知絳州絳  
在周爲晉國在漢爲絳侯封邑其地包汾隰土隱民  
繁產薄稅重人鮮知教而健于訟前守不數年率以  
事去未有滿考者公至州以謂人給則教行知教則  
訟息因行其土利有未興者興之視民業有偷惰者  
董之不數年民業饒給乃大修孔子廟益廣學宮篤  
興禮義放養具修絳俗日變爭訟衰息獄至空虛公  
尤善處事先時事有未集者督以豪猾吏卒因賁緣  
爲奸民茹其毒公卽有事但書片紙爲期約布告鄉  
市民相勸趨下不知擾而事亦集州租率歲遠輸給

邊軍旁郡惟徵銀易米公則布帛糴表諸物任民所  
濟持取租辦而已人甚便之境有蟲類蝗將害稼公  
禱諸正神蟲害隨息有行劫者出其境卽掩捕如法  
人服其明其他善政甚多不能悉紀大者如此公在  
官九年考績當去者民相率將詣藩臬乞畱公固止  
之則相與刻石以紀其政蹟行有日暴疾卒其子佐  
旣經奉柩歸以某年某月某日葬某原生于洪武丙  
子三月十七日景泰元年五月二十七日卒享年五  
十有五公初娶何氏再娶吳氏皆先卒後娶胡氏子  
男二并二女長政蚤卒次卽佐也爲縣學生公在絳



時先遣其家歸金路胡氏聞公訃哭泣喪明妻貞子  
孝又知公之放行于家也公爲人性坦夷不爲防畛  
篤于孝親追遠與人交始終無失其知絳州時嘗校  
文山東惟視其優于理者取之後登進士榜于是年  
舉子爲多人以公爲能因言以知人山右多聲妓官  
以音樂佐酒取敗者相踵公速客不用絲竹惟禮飲  
終宴不譁其雅致尤不可尚已於戲人才爲難有才  
而驗諸設施爲尤難公之才見于教人治民灼有成  
效如此謂將遠施而止於斯豈非命耶雖然公自筮  
仕以來將三十年克致完節以沒有子克襄葬事亦

可謂無憾也已公二子皆從余學故知公尤詳旣按  
狀并取所未載者述其行實事業表于墓道以告來  
者

王汝績政蹟碑記

薛瑄

絳州耆民段祐德等纂其守王汝績曰守臨川人也  
發跡儒業累官來知是州其爲政急于教養而緩于  
刑罰州學廟廡堂齋庠隘敝漏守皆廣而新之修學  
政以勵士子延師儒以教民間子弟風化之美延及  
旁郡民以事至州者告以教本節用孝弟禮讓之道  
雖氓之愚且賤者懇懇誨之不倦此其教人之大者

他不能盡記也處事無小大必敬必慎尤篤于信以  
接下凡有徵集不遣人至鄉第書片紙付里甲與民  
爲期約民勸趨其期無敢緩者里間宴然無追呼之  
擾犬不夜吠民不見吏者有焉絳地瘠且隘守勸民  
耕稼蠶桑以時悉墾不食之地使種五穀以是收倍  
沃土民之衣食饒給夏秋二稅遠輸者非陸載所及  
近入者有加耗之弊守處之有方防禁有法故租不  
後期民不知擾境內嘗有蝥生將害及禾稼守禱以  
虔誠蟲害隨息絳俗勇于私鬪忿不能勝卽投井死  
其親屬厚誣與鬪者或至破產守督禁立絕民皆稱

便州境數年盜賊殆絕忽有行劫數人守悉掩置之  
法人服其明民有遠年流移四外者聞守政寬仁皆  
扶老攜幼歸者踵至守加賑恤使之樂生興事此其  
養民之大者不能悉舉也民有爭訟細事非有大惡  
當治者卽懲責諭遣之犴獄空虛者累年嘗有穿窬  
小盜或欲深治之守不聽一當以本律此其緩于刑  
罰也余謂牧養刑罰爲治之三要汝續皆知其緩急  
而先後舉行之是宜民感厥惠求文錄石欲垂聲譽  
于永久也余不敢溢美惟次第段祐德等辭使刻之

蒲州知州張公廉志銘

薛瑄

天順二年七月十七日致仕奉直大夫蒲州知州張公卒於其家之正寢八月初其長子鼎以公狀遣其弟鼎來乞志銘葬按狀公諱廉字惟清世爲陝西西安咸寧人公高祖德用仕元翰林學士承旨曾祖思忠祖公諒考秉文三世皆蓄善弗耀秉文娶范氏生公有美質自童穉時已不好戲異凡兒父母鍾愛特甚方十二歲卽遣入郡學從師友習舉子業二十二領永樂癸卯鄉薦入太學僅三年以才中時用不次遷擢刑部照磨未幾改除山西臨汾縣丞佐政有聲

調蒲州判官用保陞知州事蒲爲大州事劇難治公  
旣正職蒞事乃剗刮積弊以身率人自家及官皆有  
檢飭條法教民作業以時與民以信凡賦調不督而  
集極力扶植柔善于豪強則重加繩抑不少貸尤知  
爲州急務修舉學政如有不及寅恭祀典壇場祠宇  
悉皆修治蒞事數十年無非法一事以擾其屬縣子  
嘗使川蜀道過其州見其廳治落落無事惟聞誦讀  
聲問之則曰課吏讀律使知畏法且不暇游惰耳若  
公者可謂能其職矣蒲去咸寧甚近時公父母俱康  
強乃迎致就養極其娛奉及二親先後沒世俱葬祭

文禮又可謂能其子矣公丁內艱時蒲之軍民合詞  
保留又可見其爲人所愛慕焉及謝事去時方年五  
十有二家居惟教子孫與宗族朋舊過從爲事他無  
所勞其心又可謂能安于退休者公娶王氏生三子  
曰鼎曰鼐曰鼐鼎嘗從予學中癸酉鄉貢方待會試  
於家年五十有七嗚呼公之行已始終無玷如此是  
可銘已

晉州知州李君愚傳

朱睦㮮

李愚字克明蘭陽人也弱冠舉於鄉授澄州知州以  
禮讓喻俗不規規於簿書期會之間一郡盡化之成  
化七年茅岡宣慰等土夷乘剽千斤之亂出沒剽掠  
每過州境戒戢儕類勿有所犯其威革强暴類此州  
俗女子年踰三十始嫁愚檄屬邑俱宜依期婚娶其  
貧不能舉者亦宜設法資之一歲中完娶者二千餘  
家巡撫都御史吳琛聞之以東帛勞異惟外艱歸服  
闋改知晉州值歲凶愚賑恤既不遺餘力是年大  
水復至愚乃上疏其畧曰今陛下致治之道至矣



報災之法密矣而水旱屢見者何也或者官人未備而天意有在于此未可知也臣聞男子生而願爲之有室女子生而願爲之有家一有拂鬱則憤懣之氣必干天和昔一婦舍寃三年不雨矧多于此者乎考之春秋傳曰大水者陰氣盛也若今歲雨水爲害或以陰氣使然耳嘗觀唐史太宗因早出宮女三千人我朝英宗皇帝卽位之初亦出宮女三百七十人此其驗也伏望陛下援古人已行之蹟酌今日時制之宜稽察宮女年貌老弱量爲節減務使在內在外人人得所則陰陽氣和神人胥悅而天變可回水

早自弭是 陛下大造之仁徧浹海宇國家太平之  
福亦永保無疆矣疏入 純皇震怒逮策京師頃之

上感悟詔釋愚出官女五百餘人愚既還職益自  
振勵會妖賊桑冲作亂愚以計擒之 上嘉其能特  
令榜諭後數年致仕歸子鉉內黃知縣愚卒六十餘  
年提學副使朱大器始祀于鄉賢祠論曰昔漢嚴安  
徐樂上書言事頗寓規諷而史氏采之究其終無它  
表見今李公愚之疏可謂嬰逆鱗矣祝嚴徐孰爲難  
易又兩守僻郡咸有治績而世無知者亦可慨矣

澤州知州陸公偉志銘

楊 康

公陸氏諱偉字仲奇別號質菴人世祖金當宋南渡  
由汴至杭於錢塘家焉後遂爲錢塘人公生而端凝  
重厚爲童子時已毅然自立雖長者不敢有犯年十  
三郡守孫君選補郡庠弟子員試之作對矢口而成  
孫君謂此子器宇不凡異日必有聞于時不但以其  
藝而已自此治戴氏經大肆力于學所爲舉業經義  
不下數十冊領成化乙酉鄉薦值家中替開門授徒  
資以爲養二親相繼下世哀毀幾滅性旣而累試禮  
部輒報罷久之謁適天曹時 原王公爲冢宰試公

居第一。授山西澤州知州。州羅游饑人至相食。公奏發內帑沿門賑救。區畫纖悉。不懈晝夜。全活以數萬計。于是人人畫公像而生祀之。州多宗室分封和買。存併之害其來已久。歲時祿米後輸辱及官吏率以爲常。公至悉裁之。以法世家大族鄉曲。因武斷閭左。苦陵轍者皆禁不得肆。與夫請託一切不行。因相與銜之。嫁禍於公。喉宗室誣奏數事。下法司勘讞。詔使初至。惑于浮言。幾中危。法州民無老少填塞街巷爲之稱冤。使者繼至。始廉得其實事。乃白比去猶慰公母。以此自沮。時鄰封大同有獄久不決。司空才

公檄公訊之公盡得其狀發槌如神才公驚喜執公  
手曰微子何以折斯獄遂爲忘勢之交澤州有寧山  
衛軍民雜處恒患弗靖公憐之以威彼此帖然總鎮  
中貴歲有祇候之索所屬爭先取客公獨不與旣而  
政通人和視民可役廢可興乃葺州治新儒學明道  
程先生嘗爲晉城令州舊有祠公謂先生豈泛然名  
宦僅僅循吏而已哉遂重修其祠至於漏澤園常平  
諸倉曰路曰橋靡不畢舉然小民雖甚德公而前之  
怨家興訛造謗爲害未已公乃嘆曰人當自知止足  
不然必速頽濟乃力懇當路致其事而歸州民攀留

數十里不絕車至不得行多有泣下者公慰諭而遣之時弘治辛亥也公歸惟以教誨子孫爲務每夜至二鼓方就寢家庭肅然宗族不能婚娶里鄰不能殯葬者已雖不給亦汲汲以周之間與鄉之不仕及倦而歸者徜徉于西湖孤山之間更唱迭和有歸田錄傳于時居常最甘澹薄子世味漠如也每謂士當以立志爲先以涵養爲要否則大本不立一事不可爲矣公性不喜酒年至耄耋燈下細字猶能讀之喜吟詩有稿藏於家作字不喜行草與平幼家間亦真楷如似割蓋其天性嚴整然也嘉靖壬午十二月疾終于正寢遺言子孫仕者以忠孝報國處者以勤儉守家享年八十有九

壺關縣知縣吳公傑傳

杞志

吳傑字漢甫正德己卯舉于鄉性行孤介律身廉潔不苟同于俗既第猶躬耕不輟母亡貧不能葬適流賊至居民皆逃公獨守母柩不忍去賊至嘆曰孝哉此子戒勿相犯後爲壺關令甫四月儲穀二千餘石衣粗布之衣食脫粟之食其清苦尤爲罕儼故人有欲以私薦之者公力卻之曰使我賢也薦不必公使我不賢也不必公薦後卒于官至無以爲斂同官有賄之者其妻曰吾夫生平不愛一錢豈以死而易哉竟不受

山西霍州儒學學正曹公端傳 黃佐

永樂中以理學鳴者河南澠池有曹月川先生正夫  
端戊子鄉薦己丑乙榜授霍州學正壬寅改蒲州教  
人以踐履爲主日事著述有四書說詳太極西銘通  
書釋文孝經述解性理文集儒家宗統譜家規輯畧  
存疑錄夜行燭等編其事父母養志喻色伙食衣服  
惟務精潔及迎喪五味不入口寢苦枕塊始終不易  
旣葬廬墓六年建祠堂以事先又建義祠以薦外族  
之無後者不用浮屠巫覡詣縣上書請毀淫祠年荒  
訪賑全活甚衆屢舉同僚之喪貧不能赴任者贖之



客庵者葬之學徒從教一於禮義郡人皆薰然而化  
甲辰蒲霍二州弟子上章競畱之霍州先上得允宣  
德甲寅卒于官正統中河南僉事姑蘇張敬澗池知  
縣胡復立特祠

焦太史編輯國朝獻徵錄卷之九十七終